

摘藻堂四庫全書薈要

史部

欽定四庫全書薈要

史部

明史卷二百

三十八
至四十

詳校官主事臣陳木



欽定四庫全書薈要卷六千八百三十一

史部

明史卷二百三十八

大學士張廷玉等奉 敕修

傳第一百二十六

李成梁

子如松

如柏

如楨

如樟

如梅

麻貴

兄

錦等

李成梁字汝契高祖英自朝鮮內附授世鐵嶺衛指揮僉事遂家焉成梁英毅驍健有大將才家貧不能襲職

年四十猶為諸生巡按御史器之資入京乃得襲積功
為遼東險山參將隆慶元年土默特入永平成梁赴援
有功進副總兵仍守險山尋協守遼陽三年四月張已
克什等屯塞下成梁擊斬之殲其卒百六十有奇餘衆
遠徙遂空其地錄功進秩一等四年九月錫林阿大入
遼東總兵王治道戰死擢成梁署都督僉事代之時諳
達雖款塞而察罕部長土默特與從父哈斯坦弟衛徵
大衛徵從弟努圖克恭圖子布延台吉從子黃台吉勢

方強泰寧部長蘇巴爾噶綽哈及顏部長董呼哩長安
佐之東則王果王烏塔青噶諾爾楊珠諸爾之屬亦時
窺塞下十年之間殷尚質楊照王治道皆戰死成梁乃
大修戎備甄拔將校收召四方健兒給以厚餼用為選
鋒軍聲始振明年五月敵犯盤山驛指揮蘇成勛擊走
之無何土默特入成梁遇於卓山麾副將趙完等夾擊
斷其首尾乘勝抵巢馘部長二人斬首五百八十餘級
署都督同知世廕千戶又明年十月土默特六百騎營

舊遼陽北河去邊二百餘里俟衆集大舉成梁擊走之
萬歷元年又擊走之前屯已又破走之鐵嶺鎮西諸堡
增秩二等朶顏烏魯斯哈以四千騎毀牆入成梁禦
却之建州都指揮王杲故與撫順通馬市及是誘殺備
禦裴承祖成梁謀討之明年十月杲復大入成梁檄副
將楊騰遊擊王惟屏分屯要害而令參將曹簠挑戰諸
軍四面起敵大奔盡聚杲寨寨地高杲深溝堅壘以自
固成梁用火器攻之破數柵矢石雨下把總于志文秦

得倚先登諸將繼之果走高臺射殺志文會大風起縱
火焚之先後斬馘千一百餘級毀其營壘而還進左都
督世廕都指揮同知果大創不能軍走匿阿哈鼐寨曹
鼐勒精騎往果走南關都督王台執以獻斬之三年春土默
特犯長勇堡擊敗之其冬綽哈大會哈斯坦黃台吉布
延台吉伊勒登努圖克恭圖都呼勒等二萬餘騎從平
虜堡南掠副將曹鼐馳擊遂轉掠瀋陽見城外列營乃
據西北高墩成梁邀戰發火器敵大潰棄輜重走追至

河溝乘勝渡河擊斬以千計加太子太保世廕錦衣千戶明年哈斯坦大衛徵營大清堡邊外謀錦義成梁率選鋒馳二百里逼其營破之殺部長四人獲級六十有奇五月土默特復入聯營河東遣零騎西掠成梁掩其巢得利而還明年正月蘇巴爾噶糾土默特入營劈山成梁馳至丁字泊敵方分騎繞牆入成梁夜出塞二百里搗破劈山營獲級四百三十馘其長五人加太保世廕本衛指揮使三月游擊陶承謨擊敵長定堡獻馘四

百七十有奇帝告謝郊廟大行賞賚廕成梁世指揮僉
事有言所殺乃土默特部曲因盜牛羊事覺懼罪來歸
承譽掩殺之給事中光懋因請治承譽殺降罪御史勘
如懋言兵部尚書方逢時督撫梁夢龍周詠先與承譽
同叙功力為解卒如御史奏盡奪諸臣恩命六月敵犯
鎮靜堡復擊退之十二月蘇巴爾噶綽哈努圖克恭圖
會土默特黃台吉大小衛徵布爾噶鴻和台等三萬餘
騎壁遼河攻東昌堡深入耀州成梁遣諸將分屯要害

以過之親提銳卒出塞二百餘里直搗圜山斬首八百四十及其長九人獲馬千二百匹敵聞之皆倉皇走出塞論功封寧遠伯歲祿八百石時土默特數求貢市關吏不許大恨七年十月復以四萬騎自前屯錦川營深入成梁命諸將堅壁自督參將楊栗等過其衝會戚繼光來援敵遂退俄又與蘇巴爾噶合壁紅土城聲言入海州而分兵入錦義成梁踰塞二百餘里直抵紅土城擊敗之獲首功四百七十有奇迤東都督王烏塔故通

市寬旬後參將徐國輔弟國臣強抑市價烏塔乃與趙
索囉科數遣零騎侵邊明年三月以六百騎犯靈陽及
黃岡嶺指揮王崇義戰死復以千餘騎從永甸入成梁
擊走之追出塞二百里敵以騎卒拒而步卒登山鼓譟
成梁大敗之斬首七百五十盡毀其營壘掠聞并錄紅
土城功予成梁世襲秋烏塔復犯寬甸副將姚大節擊
破之烏塔由是不振土默特數侵邊不得志忿甚益徵
諸部兵分犯錦義及右屯大凌河以城堡堅不可克而

成梁及薊鎮兵亦集乃引去無何復以二萬餘騎從大鎮堡入攻錦州參將熊朝臣固守而遣部將周之望王應榮出戰頗有斬獲矢盡皆戰死敵乃分掠小凌河松山杏山成梁馳援始出境九年正月土默特復與哈斯坦大小衛徵布延台吉諾穆圖黃台吉伊勒登努圖克恭圖綽和爾聚兵塞下謀入廣寧成梁率輕騎從大寧堡出去塞四百餘里至鄂蘭圖大戰自辰迄未敵敗走官軍將還敵來追成梁逆擊且戰且行先後斬首三百

四十及其長八人錄功增歲祿百石世廕一等四月哈
斯坦伊勒登小岱青布延圖入遼陽副將曹簠追至長
安堡遇伏失千總陳鵬以下三百十七人馬死四百六
十匹遂大掠人畜而去簠等下吏成梁不問十月土默
特復連蘇巴爾噶等十餘萬騎攻圍廣寧不克轉掠團
山堡盤山驛及十三山驛攻義州成梁却之十年三月
蘇巴爾噶率弟綽哈子布延圖犯義州成梁禦之鎮夷
堡設伏待之蘇巴爾噶入參將李平湖射中其脅墜馬

蒼頭李有名前斬之寇奔追馘百餘級綽哈等慟哭去
蘇巴爾噶為遼左患二十年至是死帝大喜詔賜甲第
京師世廕錦衣指揮使初王杲死子阿爾台走依翁台
長子呼爾噶以翁台獻其父嘗欲報之翁台死呼爾噶
勢衰阿爾台附北關合攻呼爾噶又數犯孤山汎河成
梁出塞遇於曹子谷斬首一千餘奇獲馬五百阿爾台
復糾阿海連兵入瀋陽城南渾河大掠去成梁從撫順
出塞百餘里火攻古勒塞射死阿爾台連破阿海寨擊

殺之獻馘二千三百杲部遂滅錄功增歲祿百石世廕
指揮僉事北關青噶諾爾楊珠諾爾素讐南關王台沒屢侵
台季子蒙古博囉且藉土默特努圖克鴻台吉兵侵邊
其冬巡撫李松使備禦霍九臯許之貢市青噶諾爾楊
珠諾爾率二千騎詣鎮北關謁松九臯見其兵盛譙讓
之則以三百騎入松先伏甲於旁約二人不受撫則礮
舉甲起頃之二人抵關據鞍不遜松叱之九臯麾使下
其徒據拔刀擊九臯并殺侍卒十餘人於是礮鳴伏盡

起擊斬二人并其從騎與青噶諾爾子烏遜博囉楊珠諾爾子哈兒哈麻盡殲焉成梁聞礮急出塞擊其留騎斬首千五百餘衆刑白馬攢刀誓永受約束乃旋師錄功增歲祿二百石改前廕指揮僉事為錦永衛指揮使方成梁之出塞也綽哈等以數萬騎入蒲河及大寧堡將士防禦六日始出塞十三年二月巳圖爾欲報父蘇巴爾噶之怨偕從父綽哈姑壻呼達糾西部伊勒登等以數萬騎入掠瀋陽既退駐牧遼河聲犯開原鐵嶺成梁與巡撫

李松潛為浮橋濟師踰塞百五十里疾掩其帳寇已先覺整衆逆戰成梁為壘陣親督前陣擊而松以後陣繼之斬首八百有奇捷聞增歲祿百石改廕錦衣指揮使為都指揮使其年五月敵犯瀋陽伏精騎塞下誘官軍游擊韓元功追襲之敗死閏九月諸部長復犯蒲河殺裨將數人大剽掠而西部音登亦窺遼瀋成梁令部將李平胡出塞三百五十里搗破音登營斬首一百八級諸部長始引去十四年二月土默特部長伊克輝章糾

巴圖爾綽哈呼達等三萬騎約土默特諸子共馳遼陽
挾賞成梁偵得之率副將楊燮參將李寧李興孫守廉
以輕騎出鎮邊堡晝伏夜行二百餘里至庫克穆稜大
風雷敵不覺既至風日晴朗敵大驚發矢如雨將士冒
死陷陣獲首功九百斬其長二十四人十月敵七八萬
騎犯鎮夷諸堡閱五日始去十五年春東西部連營入
犯八月復以七八萬騎犯鎮夷堡十月巴罕岱青糾土
默特十萬騎由鎮夷大清二堡入數日始出北關既被

創後青噶諾爾子布扎爾與楊珠諾爾子納琳博囉漸
強盛數與南關呼爾噶子岱遜構兵成梁以南關勢弱
謀討北關以輔翊之明年五月率師直搗其巢布扎爾
走與納琳博囉合憑城守城四重攻之不下用巨礮擊
碎其外郭遂拔二城斬馘五百餘布扎爾等請降誓不
復叛乃班師十七年三月復犯義州入太平堡把總朱
永壽等一軍盡沒九月諾穆岱合博和木達長安三萬
騎復犯平虜堡備禦李有年把總馮文昇皆戰死成梁

選鋒沒者數百人敵大掠瀋陽蒲河榆林八日始去明年二月布延台吉黃台吉大小衛徵結西部察罕塔爾爾五萬餘騎復深入遼瀋海蓋成梁潛遣兵出塞襲之遇伏死者千人成梁乃報首功二百八十得增祿廕土默特族弟圖們台珠偕西部青巴圖恰卜實克及長安恭圖十萬騎入海州成梁不敢擊縱掠數日而去十九年閏二月成梁乘給事侯先春閱視謀邀搗巢功使副將李寧等出鎮夷堡潛襲板升殺二百八十人師旋遇敵

死者數千人成梁及總督蹇達不以聞巡按御史胡克儉盡發其先後欺罔狀語多侵政府䟽雖不行成梁由是不安於位及先春還朝詆尤力帝意頗動成梁再䟽辭疾言者亦踵至其年十一月帝竟從御史張鶴鳴言解成梁任以寧遠伯奉朝請明年巳拜反寧夏御史梅國楨請用成梁給事中王德完持不可乃寢成梁鎮遼二十二年先後奏大捷者十帝輒祭告郊廟受廷臣賀蟒衣金繒歲賜稠疊邊帥武功之盛二百年来未有也

其始銳意封巴拜師出必捷威振絕域已而位望益隆
子弟盡列崇階僕隸無不榮顯貴極而驕奢侈無度軍
貲馬價鹽課市賞歲乾沒不貲金遼商民之利盡籠入
已以是灌輸權門結納朝士中外要人無不飽其重賕
為之左右每奏捷內自閭部外自督撫而下大者進官
廕子小亦增俸賚金恩施優渥震耀當世而其戰功率
在塞外易為緣飾若敵入內地則以堅壁清野為詞擁
兵觀望甚或掩敗為功殺良民冒級閭部共為蒙蔽督

撫監司稍忤意輒排去之不得舉其法先後巡按陳登
雲許守恩廉得其殺降冒功狀擬論奏之為巡撫李松
顧養謙所沮止既而物議沸騰御史朱應穀給事中任
應徵僉事李琯交章抨擊事頗有跡卒賴輿援反詰責
言者及申時行許國王錫爵相繼謝政成梁失內主遂
以去位成梁諸戰功率藉健兒其後健兒李平胡李寧
李興秦得倚孫守廉輩皆富貴擁專成暮氣難振又轉
相掎克士馬蕭耗迨成梁去遼十年之間更易八帥邊

備益弛二十九年八月馬林獲罪大學士沈一貫言成
梁雖老尚堪將兵乃命再鎮遼東年已七十有六矣時
土默特長安及巴圖爾已死寇鈔漸稀而開原廣寧之
前復開馬木二市諸部耽市賞利爭就款以故成梁復
鎮八年遼左少事以閱視叙勞加至太傅當萬歷初元
時兵部侍郎汪道昆閱邊成梁獻議移建孤山堡於章
嘉哈喇佃險山堡於寬佃沿江新安四堡於長佃長嶺諸
處仍以孤山險山二叅將戍之可拓地七八百里益收耕牧

之利道昆上於朝報可自是生聚日繁至六萬四千餘
戶及三十四年成梁以地孤懸難守與督撫蹇達趙楫
建議棄之盡徙居民於內地居民戀家室則以大軍驅
迫之死者狼籍成梁等反以招復逃人功增秩受賞兵
科給事中宋一韓力言棄地非策巡按御史熊廷弼勘
奏如一韓言一韓復連章極論帝素眷成梁悉留中不
下久之卒年九十弟成材參將子如松如柏如楨如樟
如梅皆總兵官如梓如梧如桂如楠亦皆至參將

如松字子茂成梁長子以父廕為都指揮同知充寧遠
伯勲衛驍果敢戰少從父諳兵機再遷署都督僉事為
神機營右副將萬歷十一年出為山西總兵官給事中
黃道瞻等數言如松父子不當並居重鎮大學士申時
行請保全之乃召僉書右府尋提督京城巡捕給事中
邵庶嘗劾如松及其弟副總兵如柏不法且請稍抑以
全終始不納十五年復以總兵官鎮宣府巡撫許守謙
閱操如松引坐與並參政王學書却之語不相下幾攘

臂巡按王史王之棟因劾如松驕橫并詆學書帝為兩奪其俸已復被論給事中葉初春請改調之乃命與山西李迎恩更鎮其後軍政拾遺給事中閱視數遭論劾帝終眷之不為動召僉書中府二十年巴拜反寧夏御史梅國楨薦如松大將才其弟如梅如樟並年少英傑宜令討賊乃命如松為提督陝西討逆軍務總兵官即以國楨監之武臣有提督自如松始也已命盡統遼東宣府大同山西諸道援軍六月抵寧夏如松以權任既重不

欲受總督制事輒專行兵科許弘綱等以為非制尚書
石星亦言如松敕書受督臣節度不得自專帝乃下詔
申飭先是諸將董一奎麻貴等數攻城不下如松至攻
益力用布囊三萬實以土踐之登為礮石所却如樟皮
攀雲梯上不克游擊龔子敬提苗兵攻南關如松乘勢
將登亦不克乃決策水攻已拜窘遣養子克呼該往勾
套寇如松令部將李寧追斬之已套寇以萬餘騎至張
亮堡如松力戰手斬士卒畏縮者寇竟敗去水浸北關

城崩如松及蕭如薰等佯擊北關誘賊潛以銳師襲南
關攀雲梯上巴拜及子承恩自斬叛黨劉東暘許朝乞
貸死於是如松先登如薰及麻貴劉承嗣等繼之滅巴
拜族錄功進都督世廕錦衣指揮同知會朝鮮倭患棘
詔如松提督薊遼保定山東諸軍尅期東征弟如柏如
梅並率師援勦如松新立功氣益驕與經畧宋應昌不
相下故事大帥初見督師甲冑庭謁出易冠帶始加禮
貌如松用監司謁督撫儀素服側坐而已十二月如松

至軍沈惟敬自倭歸言倭酋行長願封請退平壤迤西
以大同江為界如松叱惟敬儉邪欲斬之參謀李應試
曰藉惟敬給倭封而陰襲之奇計也如松以為然乃置
惟敬於營誓師渡江二十一年正月四日師次肅寧館
行長以為封使將至遣牙將二十人來迎如松檄游擊
李寧生縛之倭猝起格鬪僅獲三人餘走還行長大駭
復遣所親信小西飛來謁如松慰遣之六日次平壤行
長猶以為封使也竚風月樓以待群倭花衣夾道迎如

松分布諸軍抵平壤城諸將逡巡未入彤大露倭悉登
陣拒守是夜襲如柏營擊却之明旦如松下令諸軍無
軍首級攻圍缺東面以倭素易朝鮮割令副將祖承訓
詭為其裝潛伏西南令游擊吳惟忠攻迤北牡丹峯而
如松親提大軍直抵城下攻其東南倭礮矢如雨軍少
却如松斬先退者以徇募死士援鉤梯直上倭方經南
面朝鮮軍承訓等乃卸裝露明甲倭大驚急分兵捍拒
如松已督副將楊元等軍自小西門先登如柏等亦從

大西門入火器並發烟燄蔽空惟忠中礮傷胸猶奮呼
督戰如松馬斃於礮易馬馳墮塹躍而上麾兵益進將
士無不一當百遂克之獲首功千二百有奇倭退保風
月樓夜半行長渡大同江遁還龍山寧及參將查大受
率精卒三千潛伏東江間道復斬級三百六十乘勝逐
北十九日如柏遂復開城所失黃海平安京畿江源四
道並復酋清正據咸鏡亦遁還王京官軍既連勝有輕
敵心二十七日再進師朝鮮人以賊棄王京告如松信

之將輕騎趨碧蹄館距王京三十里猝遇倭圍數重如松督部下鏖戰一金甲倭搏如松急指揮李有聲殊死救被殺如柏寧等奮前夾擊如梅射金甲倭墮馬楊元兵亦至斫重圍入倭乃退官軍喪失甚多會天久雨騎入稻畦中不得逞倭背岳山面漢水聯營城中廣樹飛樓箭礮不絕官軍乃退駐開城二月既望諜報倭以二十萬衆入寇如松令元軍平壤扼大同江接餉道如柏等軍寶山諸處為聲援大受軍臨津留寧承訓軍開城

而身自東西調度聞倭將平秀嘉據龍山倉積粟數十萬密令大受率死士從間焚之倭遂乏食初官軍捷平壤鋒銳甚不復問封貢事及碧蹄敗衄如松氣大索應昌如松急欲休息而倭亦芻糧並絕且懲平壤之敗有歸志於是惟敬款議復行四月十八日倭棄王京遁如松與應昌入城遣兵渡漢江尾倭後將擊其情歸倭步步為營分番迭休官軍不敢擊倭乃結營釜山為久留計時兵部尚書石星力主封貢議撤兵獨留劉綎拒守

如松乃以十二月班師論功加太子太保增歲祿百石
言者詆其和親辱國屢攻擊之帝不問二十五年冬遼
東總兵董一元罷廷推者三中旨特用如松言路復交
章力爭帝置不報如松感帝知氣益奮明年四月土默
特犯遼東如松率輕騎遠出搗巢中伏力戰死帝痛悼
令具水冠歸葬贈少保寧遠伯立祠謚忠烈以其弟如
梅代為總兵官授長子世忠錦衣衛指揮使掌南鎮撫
司仍充寧遠伯勲衛復廕一子本衛指揮使世襲恤典

優渥皆出特恩云世忠未久卒無子弟顯忠由廕歷遼東副總兵當嗣爵朝臣方惡李氏無為言者至崇禎中如松妻武氏懇於朝章下部議竟寢後莊烈帝念成梁功顯忠子尊祖得嗣寧遠伯闖賊陷京師遇難

如柏字子貞成梁第二子由父廕為錦衣千戶嘗與客會飲礮聲徹大內下吏免官再以廕為指揮僉事數從父出塞有功歷密雲游擊黃花嶺參將薊鎮副總兵萬歷十六年御史任養心言李氏兵權太盛姻親廝養分

操兵柄環神京數千里縱橫蟠據不可動搖如柏貪淫
跋扈尤甚不早為計恐生他變帝乃解如柏任於是成
梁上書乞罷并請盡罷子弟官帝慰留不許久之起故
官署宣府參將引疾歸如松之禦倭朝鮮也詔如柏署
都督僉事先率師赴援既拔平壤如柏疾趨開城攻克
之斬首百六十有奇師旋進都督同知為五軍營副將
尋出為貴州總兵二十三年改鎮寧夏卓哩克圖犯平
虜橫城如柏邀之大獲斬首二百七十有奇進右都督

再以疾歸家居二十餘年會遼東總兵官張承廕戰歿
文武大臣英國公張惟賢等合疏薦如柏詔以故官鎮
遼東蒙古綽哈入犯督諸將擊却之始成梁如松為將
厚畜健兒故所向克捷至是父兄故部曲已無復存而
如柏暨諸弟放情酒色亦無復少年英銳特以李氏世
將起自廢籍中顧如柏中情怯惟左次避敵而已我
大清師臨河如柏故引軍防懿路及楊鎬四路出師令
如柏以一軍出鴉鵲關甫抵呼蘭路鎬聞杜松馬林兩

軍已覆急檄如柏還

大清哨兵二十人見之登山鳴螺作大軍追擊狀如柏軍大驚奔走相蹴死者千餘人御史給事中交章論劾給事中李奇珍連疏爭尤力帝終念李氏詔還候勘既入都言者不已如柏懼遂自裁

如楨成梁第三子由父廕為指揮使屢加至右都督並在錦衣嘗掌南北鎮撫司提督西司房列環衛者四十年最後軍政拾遺部議罷職章久留不下如楨雖將家

子然未歷行陣不知兵及兄如柏革任遼人謂李氏世鎮遼東遼人憚服非再用李氏不可巡撫周永春以為言而是時如柏兄弟獨如楨在兵部尚書黃嘉善遂徇其請以如楨名上帝即可之時萬歷四十七年四月也如楨藉父兄勢又自以錦衣近臣不肯居人下未出關即遣使與總督汪可受講釣禮朝議譁然嘉善亦特疏言之如楨始怏怏去既抵遼經畧楊鎬使守鐵嶺鐵嶺故李氏宗族墳墓所在當如柏還京其族黨部曲高貲

者悉隨之而西城中為空後鎬以孤城難守令如楨還屯瀋陽僅以參將丁碧等防守力益弱

大清兵臨城如楨擁兵不救城遂失言官交章論列經畧熊廷弼亦論如楨十不堪乃罷任天啟初言者復力攻下獄論死崇禎四年帝念成梁勛特免死充軍

如樟亦由父廕歷都指揮僉事從兄如松征寧夏先登有功累進都督僉事歷廣西延綏總兵官

如梅字子清亦由父廕歷都指揮僉事從兄如松征日

本却敵先登屢遷遼東副總兵二十四年綽哈布延圖
將入犯如梅謀先襲之督部將方時新等出塞三百里
直搗其廬帳斬首百餘級而還明年如梅與參政楊鎬
謀復從鎮西堡出塞潛襲敵營失利損部將十人士卒
百六十人如梅以血戰重創免罪日本封事敗其年八
月進署都督僉事充禦倭副總兵赴朝鮮援勦時麻貴
三路進師令如梅將左軍與右軍共攻蔚山如梅偕參
將楊登山騎兵先進設伏海濱而令游擊巴薩以輕騎

誘賊斬首四百有奇餘賊遁歸島山副將陳寅冒矢石

奮呼上破柵兩重至第三柵垂拔楊鎬為總理宿與如

梅暱不欲寅功出其上遽鳴金收軍翊日如梅至攻之

不能拔已而賊援至如梅軍先奔諸軍亦相繼潰贊畫

主事丁應泰劾鎬并劾如梅當斬者二當罪者十帝不

納旋用為禦倭總兵官會其兄如松戰歿即命如梅馳

代之踰年坐擁兵畏敵劾罷久之起僉書左府四十年

鎬巡撫遼東力薦如梅為帥不得至以死爭給事中麻

僖御史楊州鶴力持不可乃止成梁諸子如松最果敢
有父風其次稱如梅然躁動非大將才獨楊鎬深信後
復倚任其兄如柏卒以致敗

麻貴大同右衛人父祿嘉靖中為大同參將從鎮帥劉
漢襲板升大獲諳達圍右衛祿與副將尚表固守乘間
擊斬其部長寇乃退錫林阿犯京東祿以宣府副總兵
入衛與子游擊錦並有却敵功貴由舍人從軍積功至
都指揮僉事充宣府游擊將軍隆慶中遷大同新平堡

參將寇大入掠山陰懷仁應州將吏並獲罪獨貴與兄
副將錦拒戰有功受賞萬歷初再遷大同副將兵十年
冬以都督僉事充寧夏總兵官無何徙鎮大同時諸部
納款久徹哩克襲封順義王奉中國益虔貴頻以安邊
勞蒙賜賚十九年為閱視少卿會乾亨所劾謫戍邊明
年巴拜反廷議貴健將知兵且多畜家丁乃起戍中為
副將總兵討賊屢攻城不克其五月巴拜以套寇五百
騎圍平虜堡貴選精卒三百間道馳却之俄以總督魏

學會命撫卓哩克圖伊勒敦宰桑於橫城啖以重利皆不應貴乃還攻城寧夏總兵董一奎攻其南固原總兵李煦攻其西故總兵劉承嗣攻其北牛秉忠攻其東貴以游兵主策應巴拜自北門出戰將往勾套部貴逐之入城別遣將馬孔英麻承詔等擊套寇援兵俘斬百二十人已拜初與套部深相結諸部長稱之為王日坐卓哩克圖帳中主籌畫至是不敢復出俄朝命蕭如薰代董一奎盡將諸道援兵以貴為副而李如松軍亦至攻益

急賊奉黃金繡蟒于布色圖等請急徇靈州先據下馬
關沮饗道布色圖與章圖哩果合兵犯定邊而宰桑從
花馬池西沙湃入貴迎擊挫宰桑於石溝會董一元搗
圖們巢諸部長解去賊復乞援於卓哩克圖擁衆大入
如松率勁騎迎戰張亮堡自卯迄巳敵銳甚會貴及李
如樟等兵至夾擊之寇乃却逐北至賀蘭山獲首級百
二十餘持示賊賊益恟懼無何城破賊盡平貴以功增
秩予廕尋擢總兵官鎮守延綏二十二年七月布色圖

糾諸部深入定邊營張春并貴乘虛搗其帳於套中斬首二百五十有奇還自寧塞復邀其零騎會寇留內地久轉掠至下馬關寧夏總兵蕭如薰不能禦總督葉夢熊急檄貴赴援督副將蕭如蘭等連戰曬馬臺薛家窪斬首二百三十有奇獲畜產萬五千帝為告廟宣捷進署都督同知予世廕明年布色圖復入寨掠八日而還順義王徹哩克約之納款不從復擬大入貴勒兵萬五千游擊閻逢時等出紅山為中軍參將師以律等俱出

高家堡神木孤山為左軍參將孫朝梁等出定遼安遼
平山為右軍而自以大軍當一面銜枚疾趨塞六十
里寇莫知所防大潰俘斬四百有奇獲馬駝牛羊千五
百再進秩子廕尋以病歸二十五年日本封事敗起貴
備倭總兵官赴朝鮮已加提督盡統南北諸軍貴馳至
王京倭已入慶州據開山島圍南原守將楊元適全州
守將陳愚衷亦遁倭乘勢逼王京貴別遣副將解生守
稷山朝鮮亦令都體察使李元翼出忠清道遮賊鋒生

頗有斬獲功參將彭友德亦破賊青山倭將行長退屯井邑清正還慶州經畧邢玠經理楊鎬先後至分兵三協左李如梅右李芳春解生中高策貴與鎬督左右協兵專攻清正策駐宜寧東援兩協西扼行長諸軍至慶州倭悉退屯蔚山如梅誘敗之清正退保島山築三砦自固遊擊茅國器率死士拔其砦斬馘六百五十諸軍遂進圍其城城新築以石堅甚將士仰攻多死圍十日倭襲敗生兵明年正月二日行長來援九將兵俱潰賊

張旗幟江上鎬懼倉皇撤師詭以捷奏既而敗狀聞帝
罷鎬責貴以功贖與劉綬陳璘董一元分四路貴居東
當清正數戰有功會平秀吉死官軍益力攻十一月清
正先遁貴遂入島山西浦諸路共俘斬二千二百有奇
明年三月旋師進右都督予世廕三十八年命貴鎮遼
東泰寧綽哈素桀驁九子各將兵他部濟賽努圖克又
助之邊將畏戰但以增歲賞為事寇益無所忌明年臨
邊要賞將士出不意擊之拔營遁徙額呼蘇居焉其地

忽天鳴地震綽哈驚懼再徙渡老河去邊幾四百里其
第三子色特爾哂之南移庫克穆稜伺隙入犯貴伏兵
敗之追北至白雲山斬馘三百四十有奇色特爾憤謀
復讐糾濟賽伊勒登不應乃東糾布延昆巴雅爾西糾
哈喇汗奈曼合犯清河皆潰伊勒登等懼代綽哈求款
邊境乃寧明年察罕呼爾敦圖以三萬騎入掠穆家堡
敗去其夏貴引病乞罷詔乘傳歸貴果毅驍捷善用兵
東西並著功伐先後承特賜者七錫世廕者六及歿予

祭葬稱一時良將焉兄錦少從父行陣有戰功累官千
總協守大同右衛千戶魏昂者坐罪亡入沙漠引寇至
城下挾取妻子錦伏甲禽之諳達圍城數突圍城卒完
尋以殺人并父奪官下吏當事以塞上方用兵而錦父
子兄弟並敢戰曲法貸之屢遷宣府遊擊將軍以勤王
功進秩一等遷大同參將隆慶初進本鎮副總兵從趙
尙出塞敗寇兵與弟貴並有保境功諳達納款錦招塞
外叛人歸者甚衆萬歷五年擢山西總兵官尋改鎮宣

府卒錦子承勛遼東副總兵都督僉事南京後府僉書
從子承恩都督同知宣府延綏大同總兵官更歷諸鎮
以勇力聞後起援遼東屢退避下獄當死詔內馬八百
匹免罪其家遂破承詔寧夏參將從平巴拜有功後為
蒼頭所弑承訓薊鎮副總兵承宣洮岷副總兵承宗遼
東副總兵天啟初戰死沙嶺麻氏多將才人以方鐵嶺
李氏曰東李西麻

贊曰自諳達款宣大薊門設守固而遼獨被兵成梁遂

擅戰功至剖符受封震耀一時倘亦有天幸歟麻貴宣
力東西勲閥可稱兩家子弟多歷要鎮是以時論以李
麻並列然列戟擁麾世傳將種而惟怯退避隳其家聲
語曰將門有將諸人得無愧乎

明史卷二百三十八終

欽定四庫全書

明史卷二百三十八考證

李成梁傳錫林阿大入遼東

臣方煒按錫林阿大入

遼東考本紀謂犯錦州也謹識

李成梁傳杲走南關都督王台執以獻斬之

臣方煒

按明實錄王台執王杲時並送進王杲原擄軍士八

十二名謹識

李成梁傳復以二萬餘騎從大鎮堡入攻錦州

臣方

煒按二萬餘騎從大鎮堡入攻錦州分掠小凌河等處考明實錄係萬厯九年正月事紀載互異謹識

李成梁傳帝竟從御史張鶴鳴言解成梁任

臣方煒

按明實錄張鶴鳴疏稱成梁血氣既衰罪惡貫盈謹識

李成梁傳馬林獲罪

臣方煒按馬林獲罪事詳馬芳

傳謹識

李成梁傳

子如松附

給事中邵庶嘗劾如松及其弟副

總兵如栢不法

臣方煒按庶嘗劾如松與如栢不

法當即指後文所云驕橫及如栢傳所云會飲諸事

謹識

李成梁傳

子如楨附

經畧熊廷弼亦論如楨十不堪

臣方煒按十不堪史未臚列他書亦無可考謹識

李成梁傳

子如梅附

丁應泰劾鎬并劾如梅當斬者二

當罪者十

臣

方煒按當斬者二當罪者十傳未臚

列考楊鎬傳亦第言丁應泰劾鎬當罪者二十八可

羞者十如梅事未詳及他書亦無可考謹識

麻貴傳斬首二百五十有奇

臣方煒按明實錄七月

內前後斬獲首級一千六百餘與傳所載不符謹識

欽定四庫全書薈要卷六千八百三十二

史部

明史卷二百三十九

大學士張廷玉等奉 敕修

列傳第一百二十七

張 臣

子承廕 全昌

孫廕昌 德昌

董一元

王

保

杜

桐

弟松 孫弘域

孫文煥

蕭如薰

達 雲

尤繼先

官秉忠

柴國柱

李懷信

張臣榆林衛人起行伍為隊長躋捷精悍搏戰好陷堅
從千總劉朋守黃甫川朋遇寇喪馬被圍臣單騎馳救
射中其魁奪馬載朋歸由此知名旋代朋職屢戰跨馬
梁李家溝高家堡田家梁西紅山並有功遷宣府膳房
堡守備寇嘗大入環攻堡欲生得臣臣召麾下酌水為
酒觀呼歌飲寇莫測所為不敢登臣夜決圍出取他道
以歸上官壯之擢延綏入衛遊擊將軍隆慶元年九月
土默特入昌黎撫寧樂亭盧龍遊擊至灤河諸將莫敢

戰臣獨勒兵赴之遼帥王治道曰敵衆我寡往必無利
臣不顧率所部千人擐甲直馳呼聲震山谷寇以數騎
嘗奮前斬之追至棒槌崖斬首百十餘級墜崖死傷者
無算事寧薊鎮諸將悉獲罪臣以功增秩二級無何寇
潛入場子嶺叅將吳昂被殺命臣代之尋進副總兵領
總督標下事改守薊鎮西協萬歷初錄秋防功進署都
督僉事綽滿潛入古北口參將苑宗儒追至十八盤山
戰歿餘衆被圍臣急偕遊擊高廷禮等馳救寇始去坐

鑄一秩五年春以總兵官鎮寧夏順義王諳達報怨衛
拉特欲取道賀蘭臣不可諳達恚語不遜臣夜決漢唐
二渠水道不通復陳兵赤水口諳達乃從山後去三歲
互市毋敢譁者閱邊給事中以苛禮責望劾罷之十一
年小阿布呼犯黑峪關守將陳文治以下俱逮繫詔起
臣副總兵駐守馬蘭峪會朶顏長安屢擾邊薊鎮總兵
官楊四畏不能禦乃調四畏保定而徙臣代之長安雅
憚臣使其從母圖幹妻棟固款關乞降乃撫賞如初益

克章者諳達弟婁巴圖棄妾葉磋與小阿布呼犯黑峪
關罷歲賞既納款復猖獗以謾詞報邊臣而令大必齊
代為謝罪大必濟者順義王徹辰汗棄妾葉臣等測其
詐令將士出塞捕二十三人繫之獄令還我被掠人益
克章以所愛者五人在俘中許獻還所掠親叩闕索故
賞臣等并召大必濟入演武場譙責甚厲兩婦叩頭請
死乃貸之先後獻還八十餘人中有被拘數十年者臣
以功紀錄優敘尋進署都督同知召僉書左府事出為

陝西總兵官鎮守固原十八年春移鎮甘肅浩爾齊犯
洮河布色圖將往助之其母泣沮不從遂攜妻女行由
永昌宋家莊穴牆入臣逆戰水泉三道溝手格殺數人
奪其坐毒縣布色圖及其黨綽和爾並中流矢走臣亦被
創將士斬級以百數生獲其愛女及牛馬羊萬八百有
奇布色圖仰天大慟曰傷哉我女悔不用母言以至此
也自是不敢歸巢與宰桑匿西海已屬宰桑謝罪其母
及順義王亦代為言乃還其女而使歸套臣以功進秩

為真時諸部長桀驁甚經畧鄭洛專主款臣以為不足恃上書陳八難五要大畧云邊薄兵寡餉絀寇驕諸部順逆難明宜復額兵嚴勾卒足糧餉分敵勢明賞罰且以創重乞歸帝不許後二年謝病去臣厯四鎮其名著塞垣為一時良將子承廕由父廕積功至延綏副總兵勇而有謀尤精騎射數鏖戰未嘗挫衄萬厯三十七年代王威為延綏總兵官沙津及孟克什勒數犯邊是年冬復犯波羅神木承廕邀卻之追斬八十餘人沙津欲

修貢守臣惡其反覆拒之益徙近邊以數千騎犯雙山堡承廕擊走之俘斬百二十有奇四十年沙津復入塞承廕遮擊之嚮水斬首百七十餘級積前功進署都督同知世廕本衛副千戶是歲遼東總兵官麻貴罷敕承廕馳代之莽錦諸部近寧前守將祖天壽間出獵被圍曹莊將士死者二百三十人被掠者六百餘人天壽以數騎免事聞論死承廕初抵任獲免烏克等犯中後所拒斬其二長餘走出塞時呼爾敦圖綽哈努圖克濟賽

逼處遼境無歲不犯邊承廕未至時呼爾敦圖以三萬騎犯穆家堡參將郎名忠等遇斬其四十餘騎及再舉守將梁汝貴襲破其營已而奈曼諸部連犯中後所連山驛副總兵李繼功等力戰殪其魁徐引去自是呼爾敦圖所屬古英阿哈等三十餘部悉奉約束遼西得少安承廕旋以病去甫歲餘起守薊鎮未至復改鎮遼東四十六年四月我

太祖高皇帝起兵拔撫順巡撫李維翰趣承廕赴援承廕

急率副將頗廷相叅將蒲世芳遊擊梁汝貴等諸營並發
次撫順承廕據山險分軍三立營浚濠布列火器甫交鋒
大清兵蹴之大潰承廕世芳皆戰死廷相汝貴已潰圍
出見失主將亦陷陣死將士死者萬人生還者十無一
二舉朝震駭既而撫安三岔兒白家衝三堡連失詔逮
維翰贈承廕少保左都督立祠曰精忠世廕指揮僉事
廷相以下贈廕有差承廕子應昌全昌德昌應昌嗣祖
臣職當為指揮僉事以父陣亡增三秩為都司僉書經

畧楊鎬用為左翼遊擊四路出師使從李如栢天啟元
年遷大同井坪叅將調延綏二年秋河套入犯不能禦
免歸督師孫承宗召置麾下命駐錦州承宗去高第盡
撤松錦守具應昌亦歸崇禎二年總督楊鶴檄應昌署
定邊鎮將事河套入寇擊斬百二十餘級擢昌平副總
兵鶴遂薦應昌以副將鎮定邊四年春神一元陷保安
應昌偕左光先破斬一元其弟一魁代領其衆圍慶陽
應昌及杜文煥趨戰圍始解巴扎納圍米脂應昌偕王

承恩擊走之楊鶴撫一魁處之寧塞而殺其黨茹成名
賊黨張益金黃友才懼挾一魁以叛延綏巡撫張福臻
令應昌及馬科擊之斬首千七百餘級友才走一魁守
不下其冬洪承疇伐鶴命叅政戴君恩總兵曹文詔同
應昌討之數敗賊賊棄城走文詔偕應昌擊敗之駙馬
溝明年春應昌禽友才混天猴陷宜君鄜州襲靖邊應
昌追敗之射傷賊將白廣思八月山西總兵官馬士麟
病免擢應昌都督僉事代之言者謂寧武卒善逃宜令

應昌率所部三千人以從報可王之臣臨臨縣其地倚黃雲山榆林河水出焉入於黃河城三面峭壁西阻水巡撫許鼎臣總督張宗衡督兵攻賊與土寇田福田科等相倚久不拔會王自用陷遼州逼會城鼎臣還專以恢復責應昌六年春賊約福劫官軍撫標中軍陳國威因偽稱之臣往逆斬福頭懸城下急擊賊始降應昌在關中威名甚著及是選悞逗撓務與賊相避總督宗衡五檄之不赴奏諸朝限應昌與文詔三月平賊應昌避

賊不擊殺良民冒功為巡按御史李嵩兵科祝世美所劾帝乃遣近侍為應昌內中軍七月部卒潰鳴謙驛監視中官劉允中劾其避賊帝猶貸之令會勦畿南賊久之擊賊平山偽報首功連為允中及巡按御史馮明珩真定巡撫周堪賡所劾帝令圖功自贖七年春追賊靈寶稍有功已擊賊均州五嶺山敗績身中一矢退還河南其弟全昌為宣府總兵官宣府有警令應昌援又無功命解職候勘八年洪承疇出師河南令率私家士馬

以從三月抵信陽會賊大入秦承疇命應昌及鄧玘尤
翟文防漢江南北玘死承疇以賊必由鳳縣棧道直入
畧陽改命應昌翟文自鄖陽轉赴興安漢中以會左光
先趙光遠諸軍至六月父萬年曹文詔相繼戰歿賊盡
趨西安承疇急檄應昌及光先還救八月李自成陷咸
陽越二日應昌光先兵至擊斬四百四十餘級獲軍師
一人及全昌兵敗陷賊其潰卒歸關中掠沿河州縣山
西巡撫吳甡請令應昌收置麾下應昌已得疾不能軍

無何卒全昌由廕叙歷官靈州參將崇禎四年與同官趙大允擊點燈子於中部已連戰邵陽韓城首功多巡撫練國事請加二將副將銜大允駐耀州富平間扼賊西路全昌駐韓城邵陽間扼賊東路五年七月代應昌為定邊副總兵曹文詔追賊隴州平鳳界全昌及馬科率千人應之殄滅殆盡明年五月擢署都督僉事充總兵官鎮守宣府應昌方鎮山西兄弟接壤為大帥明年

七月

大清兵西征察罕旋師入其境攻圍龍門新城赤城克
保安州薄鎮城全昌嬰城固守已而

大清兵西行全昌進兵應州帝以其孤軍敕吳襄尤世
威赴援不應全昌至渾源以捷聞還軍葛峪羊房口襄
等復不援八月

大清兵再入其境閏八月四日克萬全右衛他城堡多
失守既解嚴兄應昌以罪解職命全昌并將其軍兵科
常自裕言文臣張宗衡等重論而武臣輕貸非法於是

全昌與文詔並戍邊用山西巡撫吳甡請命全昌文詔
為援勦總兵官與猛如虎等大破高加計八年春會洪
承疇於汝寧擊敗汝州賊俄西入關與祖大弼敗賊涇
陽未幾敗賊醴泉五月與賀人龍敗老回回於秦王嶺
尋解鳳翔圍走賊秦州敗之張家川已而都司田應龍
張應龍戰死艾萬年曹文詔相繼歿官軍益衰賊盡趨
西安承疇急檄全昌及曹變蛟先赴渭華格其前親督
軍尾其後却賊紅鄉溝賊乃南入商維承疇又命全昌

及趙光遠提兵三千截潼關大峪口部卒大譁關入榮
澤劫庫殺人河南巡撫元默請急援盧氏不聽光遠擅
歸關中全昌逆遷至潁州九月中追蝎子塊於沈邱瓦
店戰敗被執賊挾之攻蘄黃全昌因代賊求撫總理盧
象昇不許責全昌喪師辱國曰賊果欲降可滅其黨示
信賊不聽命久之全昌脫歸謁象昇陽和象昇令募兵
山陝尋薦之朝令赴軍前立功帝不許十年四月以楊
嗣昌言逮付法司謫戍邊衛德昌崇禎初為清水營守

備三年夏勦王嘉胤被傷坐奪官久之起歷保定叅將連破土寇仁義王十四年春總督楊文岳命從虎大威以五千人援開封不敢進其冬擢保定副總兵仍從文岳數有功十六年卒贈特進榮祿大夫左都督

董一元宣府前衛人父暘嘉靖中為宣府遊擊將軍諱達犯滴水崖力戰死贈官錫廕春秋世紀兄一奎都督僉事歷鎮山西延綏寧夏三邊以勇敢著一元勇如兄而智畧過之嘉靖時歷薊鎮遊擊將軍土默特合斯坦

等以萬餘騎犯一片石總兵胡鎮禦之一元功最超俸
三級遷石門寨叅將隆慶初破敵棒槌崖功復最再進
二級遷副總兵駐防古北口移守宣府萬厯十一年以
都督僉事為昌平總兵官尋徙宣府十五年徙薊州久
之効罷鄭洛經畧洮河命一元練兵西寧浩爾齊入犯
一元擊之西川多所斬獲尋以副總兵協守寧夏擢延
綏總兵官已拜之亂套中諸部長悉助之一元乘其西
掠輕騎搗圍們巢獲首功百三十驅其畜產而還寇內

掠引去進署都督同知入為中府僉事遼東自李成梁
後代以楊紹勲一歲三失事尤繼先繼之半歲病去廷
議擇帥乃以命一元泰寧蘇巴爾噶為官軍所殺其次子
巴圖爾常欲復讐從父綽哈及姑壻呼達助之勢益強
西部布延台吉故察罕土默特子也部衆十餘萬與巴
圖爾東西相倚數侵邊至是布延合伊克輝章訪穆岱
諸部聲犯廣寧而巴圖爾以綽哈呼達努圖克巴雅爾
之衆營舊遼陽將入掠鎮武錦義一元與巡撫李化龍

策曰布延雖衆然去邊遠特患巴圖爾及綽哈耳今其衆不過萬騎破之則西部將不戰走乃遣副將孫守廉馳右屯禦西部而親將大軍匿鎮武外為空營待之寇馳入營大笑以為怯乃深入官軍忽從中起奮呼臨陣自午至酉寇大奔逐北七十餘里至白沙碣俘斬五百四十有奇獲馬駝二千計巴雅爾中矢死巴圖爾亦傷餘衆終夜馳天明駐馬環哭其明日布延台吉入右屯攻五日夜守廉等固守乃引去時二十二年十月也捷

聞帝大喜祭告郊廟宣捷行賞進一元左都督加太子
太保廕本衛世指揮使兵部尚書石星以下亦進秩有
差巴雅爾最慄悍諸部倚以為強嘗誘殺慶雲守備王
鳳翔坐草歲賞至是被殲諸部為奪氣其部下遂納款
巴圖爾綽哈及布延台吉昭托爾岱青復臨邊駐牧期
以明年正月畧遼瀋東西一元慮歲晏不備為寇所乘
乃先西巡以遏其鋒化龍亦留弱卒廣寧數西發以疑
寇一元提健卒踏冰渡河監軍楊鎬與之俱度墨山天

大雪將士氣益奮行四百里三日夜乃抵其巢斬首百
二十級獲牛馬甲仗無筭全師而還巴圖爾以鎮武創
重歎曰我竟不獲報父讐手未幾死其衆散亂諸部悉
遠遁一元以功進世廕二秩久之以病歸命王保代朝
鮮再用師詔一元隸總督邢玠麾下叅贊軍事尋代李
如梅為禦倭總兵官時兵分四路一元由中路禦石曼
子於泗州先拔晉州下望晉乘勝濟江連毀永春昆陽
二寨賊退保泗州老營攻下之遊擊盧得功陣歿前逼

新寨寨三面臨江一面通陸引海為濠海艘泊塞下千
計築金海固城為左右翼一元分馬步夾攻步兵遊擊
彭信古用大礮擊寨碎其數處衆軍進逼賊濠毀其柵
忽營中礮裂煙焰漲天賊乘勢衝擊固城援賊亦至騎
兵諸將先奔一元亦還晉州事聞詔斬遊擊馬呈文赦
三聘落信古等職充為事官一元亦奪官保貶秩三等
會闕白死倭遁走石曼子為陳璘所殲一元得還故秩
賚銀幣久之卒一元厯鎮衝邊並著勞績與麻貴張臣

杜桐達雲為邊將選云王保榆林衛人驍勇絕倫起行
伍積功為延綏叅將萬厯十六年遷延綏定邊副總兵
十九年冬擢署都督僉事充昌平總兵官尋改山西薊
鎮總兵官張拜奇被劾命保與易任自嘉靖庚戌後薊
鎮重於他鎮穆宗有詔獲大小部長者破格酬他鎮不
得比迨諳達款塞宣大山西三鎮烽煙寂然陝西四鎮
以浩爾齊敗盟始復用兵然寇弱易禦獨秦寧察罕諸
部時時犯遼東而薊門密邇王畿與遼帥俱慎選以保

有威望用之朶顏長安當張臣鎮薊時納款居五六
年復連寇石門路木馬峪花場谷遂罷其市賞後偕音
登寇山海關已又馳喜峰口要賞邦奇佯許增市誘殺
其通事二十五人長安益怒犯大青山頃之遣其黨沙
哩勒等潛伏喜峰口射殺偵卒會保已至遂禽之長安
每資沙哩勒籌策懼而謝罪獻還被掠人畜保乃釋還
沙哩勒長安補五貢邊吏始補二賞互市如初御史陳
遇文援穆宗詔以請進保署都督同知副將張守愚以

下皆進秩薊三協南營兵戚繼光所募也調攻朝鮮撤
還道石門鼓譟挾增月餉保誘令赴演武塲擊之殺數
百人以反聞給事中戴士衡御史汪以時言南兵未嘗
反保縱意擊殺請遣官按問巡關御史馬文卿庇保言
南兵大逆有十尚書石星附會之遂以定變功進保秩
為真廕子督撫孫鑛李頤等亦進官受賜時論尤之二
十三年冬順義王徹哩克弟噶勒圖率三軍犯白馬關
及東西臺守備徐光啟副將李芳春戴廷春却之明年

秋復偕部長多博犯黑谷頂敗而去保度其再至分營
并連口及橫河兒寇果馳橫河官軍夜半疾抵石塘嶺
襲其營寇大驚潰乘勢追出塞其冬復犯羅文峪敗去
詔代一元鎮遼東朝鮮再用師敕保防海卒於海州贈
左都督子學書宣府總兵官學詩學禮並副總兵學書
既里居守榆林城拒李自成不屈死

杜桐字來儀崑山人徙延安衛萬厯初由世廕累官清
水營守備以謀勇著遷延綏衛遊擊將軍尋改古北口

叅將用總督梁夢龍薦擢延綏副總兵十四年就拜署
都督僉事克總兵官時布色圖以都督同知為套中主
威令不行其下各雄長志常叵測朔漠素無痘症自嘉
靖庚戌深入石州染此症犯者輒死達爾罕者布色圖
祖濟農部落也數將命奉貢累官指揮同知一日互市
還與托克托台吉等俱染痘死托克托子阿津疑邊吏
醜其父思亂及布色圖西助浩爾齊共擾河西諸部遂
蠢動十九年冬達爾罕子圖們與他部明安互市訖復

臨邊要賞聲犯內地桐與巡撫賈仁元計先出兵襲之
乃令參將張剛自神木遊擊李紹祖自孤山桐率輕騎
自榆林三道並出遇寇力戰大破之斬首四百七十餘
級馘明安而還延綏自濟農納款塞上息肩二十年自
此兵端復開明安子巴延台日思報復寇鈔無已時矣
桐先被劾罷以是役功超授右都督僉書後府二十一
年以總兵官鎮保定二十四年徙延綏明年再徙鎮寧
夏卓哩克圖宰桑入犯逆戰水塘溝俘斬百二十寇並

糾諸部連犯平虜興武桐督諸將馬孔英鄧鳳蕭如蕙

等連破之斬首二百餘級延綏將士亦數搗巢諸部長

懼乞款詞甚哀三十年二鎮撫臣孫維城黃嘉善協謀

撫之乃復貢市論功文臣自內閣以下悉進官桐以先

去職但賚銀幣許復用而已久之卒於家桐自偏裨至

大帥積首功一千八百時服其勇弟松字來清有膽智

勇健絕倫由舍人從軍累功為寧夏守備萬歷二十二

年布色圖掠張春并大入下馬關松偕遊擊史見李經

以二千餘騎邀擊馬蓮井小勝誤入伏中見戰死松經
皆重傷士卒死過半麻貴援軍至松復裹創力戰寇始
敗走時松已進遊擊將軍論功遷延綏參將貴大舉搗
巢松以右軍出清平塞多所斬獲進副總兵尋以本官
改寧夏東路松為將廉尚氣不能容物常因小忿薙髮
為僧部議聽其歸尋起孤山副總兵三十三年擢署都
督僉事代李如樟鎮延綏明年套寇犯安邊懷遠松破
之改鎮薊州三十六年夏代李成梁鎮遼東十二月敗敵

連山驛妻約蘇岱者朶顏長安子也狡黠為邊患與從父莽錦潛入薊鎮河流口大掠去復結黃台吉謀犯喜峰口松受總督王象乾指潛搗黃台吉帳以牽薊寇乃從寧遠中左所夜馳至哈流圖掩殺恭圖部落百四十餘級以大捷聞邀重賞副使馬拯謂恭圖內屬不當勦彼且復讐與松相訐松忿邀賞愈急詔予之恭圖果以無罪見勦怒小岱青又數激之乃以五千騎攻陷大勝堡執守將耿尚仁支解之深入小凌河肆焚掠遊擊于

守志遇於山口大敗死千餘人守志亦重創松駐大凌河不敢救遼人多咎松朝議謂松前僅抵錦州邊十里未嘗出塞所殺乃保塞部落悉縛殺之非陣斬松愈忿言撫按諸臣附會馬拯害其奇功自提兵出塞將搗巢以雪前恥而所得止五級士馬多陷大凌河松益慙憤數欲自經盡焚其鎧冑罷伏置一切疆事弗問兵部以聞乃勒松歸里而以王威代之松既廢時多惜其勇然惡其債事無推轂之者至四十三年河套寇大入令松

以輕騎搗浩爾齊營獲首功二百有奇後叙用逾二年
薊遼多事特設總兵官鎮山海關以松任之四十六年
張承廕戰歿詔松馳援遼陽明年二月楊鎬議四路出
師以撫順最衝令松以六萬兵當之故總兵趙夢麟保
定總兵王宣為佐期三月二日抵二道關會李如柏等
並進松勇而無謀剛復使氣二十九日夜出撫順關日
馳百餘里抵渾河半渡河流急不能盡渡松醉趣之將
士多溺河中松遂以前鋒進連克二小砦松喜三月朔

乘勢趨薩爾澣谷口時

大清方築城界凡山上役夫萬五千以精騎四百護之
聞松軍至精騎則盡伏谷口以待松軍過將半伏兵尾
擊之追至界凡渡口與築城夫合據山旁吉林崖明日
松引大軍圍崖別遣將營薩爾澣山上松軍攻崖方戰
大清益千人助之已又續遣二旗兵趨界凡以為援而
遣六旗兵攻松別將於薩爾澣山明日六旗兵大戰破
薩爾澣山軍死者相枕藉所遣助吉林崖者自山馳下

擊松軍二旗兵亦直前夾擊松兵大敗松與夢麟宣皆
歿於陣橫屍亘山野流血成渠

大清兵逐北二十里至碩奇珊而還時車營五百尚阻
渾河而松已敗頃之馬林劉綎兩軍亦敗獨李如柏一
軍遁還事聞朝議多咎松輕進天啟初贈少保左都督
世廕千戶立祠賜祭宣亦贈官立祠世廕指揮僉事宣
榆林人夢麟見父寄傳桐子文煥字毅武由廕敘歷延
綏遊擊將軍累進叅將副總兵四十三年擢署都督僉

事寧夏總兵官延綏被寇文煥赴救大破之明年遂代
官秉忠鎮延綏屢敗寇安邊保寧長樂斬首三百有奇
西路浩爾齊布延泰懼相率降沙津數盜邊為文煥所
敗遂納款既而復與濟農明安合駐高家栢林邊要封
王補賞十事文煥襲其營斬首百五十浩爾齊諸部落
攢刀立誓獻罰九九九者部落中罰駝馬牛羊數也
已沙津又伏兵沙溝誘殺都指揮王國安糾孟克什勒
犯雙山堡復犯波羅文煥擊破之追奔二十餘里當是

時套寇號十萬然其衆分四十二枝多者二三千少不
及千騎屢不得志沙津乃與濟農明安孟克什勒相繼
納款延綏遂少事文煥尋以疾歸天啟元年再鎮延綏
詔文煥援遼文煥乃遣兵出河套搗巢以致寇諸部大
恨深入固原慶陽圍延安揚言必縛文煥掠十餘日始
去命解職候勘奢崇明圍成都總督張我續請令文煥
赴救至則圍已解偕諸軍復重慶崇明遁永寧文煥頓
不進尋擢總理盡統川貴湖廣軍度不能制賊謝病去

坐延綏失事罪戍邊七年起鎮寧夏寧錦告警詔文煥
馳援俄令分鎮寧遠進右都督調守關門尋引疾去崇
禎元年錄重慶功廕指揮僉事三年陝西羣盜起五鎮
總兵並以勤王行總督楊鶴請令文煥署延鎮事兼督
固原軍數敗賊賊亦日益多會山西總兵王國樑擊王
嘉允於河曲大敗賊入據其城部議設一大將兼統山
陝軍協討乃令文煥為提督偕曹文詔馳至河曲絕饗
道以困之神一元陷寧塞文煥家破遂留文詔令文煥

西還四年御史吳牲劾其殺延川難民冒功給事中張
承詔復劾之下獄褫職十五年用總督楊文岳薦以故
官討賊無功復謝病歸子弘域天啟初厯延綏副總兵
七年夏文煥援遼即擢總兵官代鎮寧夏積資至右都
督崇禎中提督池河浦口二營練兵遏賊南渡頗有功
十三年移鎮浙江尋謝病去國變後文煥父子歸原籍
崑山卒

蕭如薰字季馨延安衛人萬厯中由世廕百戶厯官寧

夏叅將守平虜城二十年春巴拜劉東暘據寧夏鎮城
反遣其黨四略地巴拜子承恩徇玉泉營遊擊傅桓拒
守為其下所執賊已徇中衛及廣武叅將熊國臣等棄
城奔列城風靡賊黨土文秀徇平虜獨如薰堅守不下
如薰妻楊氏故尚書兆女也賢而有智贊夫死守日具
牛酒犒士巴拜養子雲最驍勇引河套卓哩克圖急攻
如薰伏兵南關佯敗誘賊入射雲死餘衆敗去又襲卓
哩克圖營獲人畜甚多卓哩克圖憤復來攻為麻貴所

却城獲全初帝聞如薰孤城抗賊大喜厚賚銀幣擢官
副總兵六月遂以都督僉事為寧夏總兵統延綏甘肅
固原諸援軍其秋竟與李如松等共平賊再進署都督同
知廕錦衣世指揮僉事妻楊氏亦被旌二十二年八月
布色圖西犯定邊關入固原塞副將姜直不能禦遂由
沙梁墮牆入直抵下馬關縱橫內地幾一月如薰免官
直下吏尋復以總兵官鎮守固原套寇入犯擊却之青
海寇糾番族犯洮岷如薰及臨洮總兵孫仁傑之禽斬

三百四十有奇撫叛番五千獲駝馬甲仗無算再鎮寧夏伊勒敦達春數入犯輒挫衄去徙鎮薊州久之罷歸再起故官鎮延綏天啟初廷議京軍不足用召邊將分營訓練如薰典神機營陞見帝賜食加獎勞焉明年出鎮徐州俄召還京復以總兵官鎮守保定五年夏魏忠賢黨劾其與李三才聯姻遂奪職崇禎初卒賜恤如制如薰為將持重更歷七鎮所在見稱自隆慶後款市既成烽燧少警輦下視鎮帥為外府山人雜流乞朝士尺

贖往者無不贖所欲薊鎮戚繼光有能詩名尤好延文士傾貲結納取足軍府如薰亦能詩士趨之若鶩賓座常滿妻楊氏繼妻南氏皆貴家女至脫簪珥供客猶不給軍中患苦之如薰莫能却也一時風會所尚諸邊物力為耗識者歎焉如薰祖漢涼州副總兵都督僉事父文奎京營副將都督同知兄如蘭陝西副總兵都督僉事事前府僉書如蕙寧夏總兵官都督同知如芷提督南京教場都督僉事

達雲涼州衛人勇悍饒智畧萬厯中嗣世職指揮僉事
擢守備進肅州遊擊將軍綽和爾入犯偕叅將楊濬擊
敗之遷西寧叅將永什卜者順義王諳達從子也部衆
強盛先授都督同知再進龍虎將軍自以貢市在宣府
守臣遇已厚不可逞乃隨諳達西迎活佛留據青海與
衛拉特塔布囊歲為西寧患嘗誘殺副將李魁邊臣不
能報益有輕中國心二十三年九月九日度將士必燕
飲擁勁騎直入南川屬番偵告雲設兵要害今番人統

出朶爾碇口外潛扼其背而已提精卒二千與戰方合

伏忽起寇首尾不相顧番人夾擊大敗之雲手馘其帥

一人斬首六百八十餘級其走峽外者又為番人所殲

獲駝馬戎器無算為西陲戰功第一所馘巴圖爾罕即

前殺李魁者其地即魁陣亡處時又皆九月也先是副

將李聯芳為寇所殺總兵尤繼先生獲其讐邊人以此

二事為快雲既勝度寇必復至厚集以待踰月寇果連

宰桑浩爾齊諸部先圍番教卜爾寨以誘官軍番不能

支合於寇寇遂逼西川雲督諸軍營康纏溝寇悉衆圍之矢石如雨雲左右衝擊自辰至申戰數十合寇死傷無算乃以長鎗鈎杆專犯西寧軍西寧軍堅不可破寇始遁追奔數十里而還捷聞帝大喜遣官告郊廟宣捷大學士趙志臯以下悉進官雲擢都督同知廕本衛世指揮使寇歲掠諸番番不敵則折而入寇及寇敗逖徙雲急招番復業者七千餘戶永什卜連犯明沙上谷雲並擊走之初南川奏捷雲已進副總兵至是命以總兵

鎮守延綏未幾鎮甘肅二十六年永什卜復犯西寧叅
將趙希雲等陣歿雲坐停俸甘寧間有松山必圖阿齊
圖宰桑卓哩克圖等居之屢為兩鎮患巡撫田樂決策
恢復雲偕副將甘州馬應龍涼州姜河永昌王鐵塊等
分道襲之寇遠竄盡拔其巢攘地五百里雲以功進右
都督廕世指揮僉事無何青海寇糾衆分犯河西五道
俱有備獻首功百七十有奇松山既復為築邊垣分屯
置戍錄功進左都督寇戀其故巢桑官軍撤防時潛兵

入犯雲據險邀擊之寇大敗斬首百六十加雲太子少保寇益糾其黨犯鎮番雲及諸將葛賴等大破之斬首三百七十餘級帝為告廟行賞進雲世廕二秩寇復入犯雲破走之時寇失松山走據賀蘭山後連青海諸部寇鈔不已伊勒敦達春元桀驁三十三年連營犯鎮番雲遣副將柴國柱擊之寇大敗去未幾青海寇復大入將士分道遮擊生禽其長實噉餘敗奔三十五年叙功雲增勲廕是年松山青海二寇復連兵犯涼州雲逆戰

紅崖大獲斬首百三十有奇雲為將先登陷陣所至未嘗挫衄名震西陲為一時邊將之冠以秋防卒於軍贈太子太保子奇勛萬歷末為昌平總兵官尤繼先榆林衛人萬歷中積功為大同副總兵十八年浩爾齊宰桑犯洮河副總兵李聯芳等戰死詔進署都督僉事充總兵官代劉承嗣鎮守固原寇據莽剌控工二川日蠶食番族且擾西寧聞官軍大集布色圖又則於水泉乃乘冰堅渡黃河北走留其黨克伯里總塔爾等五百餘人

牧莽刺川南山南山即石門大山口走烏斯藏門戶也
屬番來告繼先乃命番以八百人前導與故總兵承嗣
遊擊原進學吳顯等疾馳七百里直抵南山奮擊大破
之斬首百五十有奇生獲十二人而拜巴爾的者克伯
里從子前殺聯芳至是被禽師旋寇尾至撒川見有備
乃夜走他寇犯鎮羌西寧石羊亦俱敗浩爾齊遂徙帳
西海錄功進秩為真增世廕一秩尋以病歸起僉中軍
府事二十一年冬為遼東總兵官綽哈二千騎入韓家

路繼先督諸軍奮擊寇乃去再引疾歸二十四年起鎮
薊州自戚繼光鎮守十年諸部雖叛服不常然邊警頗
稀寇嘗一入青山口輒敗去最後長安導班白二部長
入犯道石門闕山海關京東民盡逃入通州繼先出關
寇已縱掠寧前去總督蹇達怒繼先不追擊而繼先方
收召降丁八百人欲倚為用達乃疏言番情難馭恐遺
後憂請調繼先別鎮俾隆丁隨往部議以延綏杜松與
易任巡撫劉四科爭之達復疏言守邊在自強繼先獨

言惟藉降丁去歲出關何竟不得降丁力羽書狎至邊
隘虛實久為所窺呼吸變生安所措手兵科宋一韓等
力主違議且劾繼先他事繼先遂罷卒於家繼先眇一
目習兵敢戰時稱獨目將軍

官秉忠榆林衛人萬厯中起世廕厯官固原叅將尋擢寧
夏甘肅副總兵嘗與主將達雲破寇於紅崖伊勒敦達
春屢被挫去移守薊鎮東協積功加署都督同知四十
年五月擢總兵官代張承廕鎮延綏套寇犯保寧秉忠

督叅將松文煥等敗之白土澗一日再捷俘斬二百五

十馘其長十二人無何旗牌撒勒犯長樂秉忠將輕騎
追襲之大獲益克什勒犯保寧秉忠又破之已而益克
什勒挾賞不獲再寇保寧及懷遠秉忠隨所向遮擊先
後斬首二百二十有奇益克及旗牌復以千餘騎犯
波羅遙見保寧軍遂遁去濟農者布色圖子為套中之
主士馬雄諸部見布色圖襲順義王補其五年市賞遂
挾求封王且還八年市賞邊臣不許則大怒會他部塔

類以痘瘡死妄言邊吏毒殺之而沙津盜邊又被剽去
濟農遂合套中諸部大舉入寇東道高家大栢油神木
栢林中道波羅西道磚井寧塞諸城堡盡被蹂躪副將
孫洪謨禦之大栢油中伏被圍遊擊萬化孚等不救士
卒死傷過半洪謨遂降秉忠聞寇入急遣遊擊張榜潛
劫其營又敗死四百餘人會故帥杜松寧夏帥杜文煥援
軍至並破敵而秉忠所部亦有斬獲寇始退然猶駐塞下
時鈔掠秉忠亦屢出襲擊多獲首功竟以前負被劾去官

方侯代沙計謀從雙山建安入犯秉忠設伏待之遂大敗
去斬其首二百有奇四十六年與劉綎柴國柱等同被召
令僉書前府尋赴援遼東楊鎬之四路出師也令秉忠防
守鎮城無何辭疾歸久之卒子撫民亦為寧夏總兵官
柴國柱西寧衛人萬厯中由世廕厯西寧守備驍猛善
射從叅將達雲擊寇南川勇冠軍錄功進都指揮僉事
寇盜邊輒為國柱所挫屢進涼州副總兵松山既復方
建堡置堠寇數來擾國柱擊却之伊勒敦春連兵寇

鎮番國柱馳救斬首二百有奇獲馬駝甲仗無算青海
寇大掠鎮羌黑古城諸堡守備楊國珍不能禦國柱率
遊擊王允中等擊走之伊勒敦達春復犯河西國柱邀
擊獲首功百二十擢署都督僉事陝西總兵三十六年
春改鎮甘肅伊勒敦達春屢不得志益寇鈔永昌國柱
馳與大戰敗之追至麻山湖斬首百六十有奇其部落
復入寇守備鄭崇雅等戰歿國柱坐奪俸一年河套松
山諸部長合兵入寇國柱檄諸將分道擊復斬首百六

十屢加右都督世廕指揮僉事久之罷官四十六年夏
召僉書都督府事無何代杜松鎮山海關松敗歿虎墩
兔乘機犯邊國柱等力遏之尋移鎮瀋陽謝病歸天啟
初追錄邊功加左都督卒賜恤如制

李懷信大同人由世廕歷都指揮僉事掌山西都司廉
勤數被推薦萬厯中遷延綏中路叅將進定邊副總兵
布色圖浩爾齊塔類巴延泰等歲擾邊定邊居延綏西
被患尤棘懷信勇敢有謀寇入輒敗其先後鎮帥杜松

王威張承廕官秉忠又皆一時選故邊患雖劇而士氣不衰四十三年擢甘肅總兵官延人為立生祠松山寇入掠蘆溝墩諸處懷信邀擊大敗之斬首三百有奇獲駝馬甲仗無筭已復分三道犯鎮番諸堡懷信亦分遏之寇引還將士尾其後獲首功百九十有奇自後寇入多失利去威名著河西先是陝西止設四鎮自西寧多警增設臨洮總兵官遂為五鎮然惟甘延最當敵衝故擇帥常慎而甘肅北有松山南臨青海諸部落環居其

外尤難禦懷信在鎮邊人恃以無恐四十七年遼東急
詔充援勦總兵馳赴遼東時熊廷弼為經畧令懷信偕
柴國柱賀世賢以四萬人守瀋陽努圖克綽哈謀入犯
廷弼急移懷信戍首山寇不敢入俄泛懿有警檄懷信
禦却之遼事益急諸老將多引避廷弼復負氣凌諸將
懷信不能堪亦堅卧引疾去天啟二年起鎮大同明年
罷已追錄邊功進左都督久之卒於家

贊曰張臣諸人勇略自奮著效邊陲均一時良將選也

董一元白沙塢墨山之捷奇偉不下王越至承廕與松
以將門子捐軀報國視世稱東李西麻者相去幾何等
也

明史卷二百三十九

欽定四庫全書

明史卷二百三十九考證

董一元傳十五年徙薊州久之劾罷

臣方煒按劾罷

史未詳何事他書亦無可考謹識

董一元傳石曼子為陳璘所殲一元得還故秩

臣方

煒按一元得還故秩言緣陳璘殲石曼子之故未及

一元與陳璘分道並進之故也事詳璘傳謹識

董一元傳

王保附

張邦奇被劾命保與易任

臣方煒

按張邦奇被劾傳未詳何事他書亦無可考謹識

杜桐傳桐先被劾罷以是役功超授右都督僉書後府

臣方煒按桐先被劾罷前文未詳桐被劾本文亦未詳所劾之事他書皆無可考謹識

杜桐傳桐以先去職但賚銀幣許復用而已臣方煒

按桐以先去職但賚銀幣許復用而已考前文桐先被劾罷以功超授右都督僉書後府至此已十年之久此十年中傳內並未載及桐去職事他書亦無可

考謹識

杜桐傳

弟松附

松與夢麟宣皆歿於陣

臣方煒按杜

松於乾隆四十一年蒙

謚忠烈謹識

欽定四庫全書

欽定四庫全書薈要卷六千八百三十三

吏部

明史卷二百四十

大學士張廷玉等奉 敕修

列傳第一百二十八

葉向高

劉一燝

兄一煜

一煜

韓爌

朱國祚

朱國禎

何宗彥

孫如游

孫嘉績

葉向高字進卿福清人父朝榮養利知州向高甫妊母

避倭難生道旁敗厠中數瀕死輒有神相之舉萬歷十一年進士授庶吉士進編修遷南京國子司業改左中允仍視司業事二十六年召為左庶子充皇長子侍班官礦稅橫行向高上疏引東漢西邸聚錢事為鑑不報尋擢南京禮部右侍郎久之改吏部再陳礦稅之害又請罷遼東稅監高淮語皆切至妖書獄興移書沈一貫力諫一貫不悅以故滯南京九年後一貫罷沈鯉亦去朱賡獨當國帝命增閣臣三十五年五月擢向高禮部

尚書兼東閣大學士與王錫爵于慎行李廷機並命十一月向高入朝慎行已先卒錫爵堅辭不出明年首輔賡亦卒次輔廷機以人言久杜門向高遂獨相當是時帝在位日久倦勤朝事多廢弛大寮或空署士大夫推擇遷轉之命往往不下上下乖隔甚廷臣部黨勢漸成而中官權稅開礦大為民害帝又寵鄭貴妃福王不肖之國向高用宿望居相位憂國奉公每事執爭效忠蓋帝心重向高體貌優厚然其言大抵格不用所救正十

二三而已東宮輟講者五年廷臣屢請不得命三十七年二月向高擇吉以請亦不報自是歲春秋必懇請帝皆不納貴妃王氏太子生母也薨四日不發喪向高以爲言乃發喪而禮官上其儀注稽五日不行向高復爭之疏乃下福王府第成工部以之國請向高擬旨上帝不發改明春及期迫向高請先飭儀衛舟車帝不納四十一年春廷臣交章請復諭改明春已忽傳旨莊田非四萬頃不行廷臣大駭向高因進曰田四萬頃必不能

足之國且無日明旨又不信於天下矣且王疏引祖制而祖制無有是事曩惟世宗時景王有之景王久不之國皇考在裕邸危疑不安此何可效也帝報曰莊田自有成例且今大分已定何猜向高因疏謝言皇考時名位雖未正然講讀不輟情意通今東宮輟講八年且不奉天顏久而福王一日兩見以故不能無疑惟堅守明春期而無以莊田藉口天下疑自釋帝報福王無一日兩見事向高有裁斷善處大事錦衣百戶王曰乾者京

師奸人也與孔學趙宗濟趙聖等相訐告刑官讞未竟
曰乾乃入皇城放礮上疏刑官大驚將擬曰乾死罪曰
乾遂訐奏鄭妃內侍姜巖山與學等及妖人王三詔用
厭勝術詛咒皇太后皇太子死擁立福王帝震怒逮殿
行半日曰此大變事宰相何無言內侍即跪上向高奏
奏言此事大類往年妖書然妖書匿名難詰今兩造具
在一訊即情得陛下當靜處之稍張皇則中外大擾至
其詞牽引貴妃福王尤可痛恨臣與九卿所見皆同敢

以聞帝讀竟太息曰吾父子兄弟全矣明日向高又言

曰乾疏不宜發發則上驚聖母下驚東宮貴妃福王皆

不安宜留中而別諭法司治諸奸人罪且速定明春之

國期以息羣喙則天下帖然無事帝盡用其言太子福

王得相安貴妃終不欲福王之國言明年冬太后七十

壽王宜留慶賀帝令內閣宣諭向高留上諭弗宣請令

冬預行慶壽禮如期之國帝遣中使至向高私邸必欲

下前諭向高言外廷喧傳陛下欲假賀壽名留福王約

千人伏闕請令果有此諭人情益疑賊將信王曰乾妖
言朝端必不靜聖母聞之亦必不樂且潞王聖母愛子
亦居外藩何惓惓福王為因封還手諭帝不得已從之
福王乃之國向高嘗上疏言今天下必亂必危之道蓋
有數端而災傷寇盜物怪人妖不與焉廊廟空虛一也
上下否隔二也士大夫好勝喜爭三也多藏厚積必有
悖出之釁四也風聲氣習日趨日下莫可挽回五也非
陛下奮然振作簡任老成布列朝署取積年廢弛政事

一舉新之恐宗社之憂不在敵國外患而即在廟堂之上也其言絕痛切帝知其忠愛不能行初向高入閣未幾陳用人理財策力請補缺官罷礦稅見帝不能從乃陳上下乖離之病兩疏乞罷帝不從向高自獨相即請增閣臣帝不聽及吏部尚書孫丕揚以薦賢不用求去向高特疏請留亦不報遂引疾屢諭乃出視事已又言臣屢求去輒蒙恩諭留顧臣不在一身去留而在國家治亂今天下所在災傷死亡畿輔中州齊魯流移載道

加中外空虛人才俱盡罪不在他人臣何可不去且陛下用臣則當行其言今章奏不發大僚不補起廢不行臣微誠不能上達留何益誠用臣言不徒縻臣身臣溘先朝露有餘幸矣帝不省京師大水四方多奏水旱向高又言自閣臣至九卿臺省曹署皆空南都九卿亦止存其二天下方面大吏去秋至今未嘗用一人陛下萬事不理以為天下長如此臣恐禍端一發不可收也帝亦不省四十年春向高以歷代帝王享國四十年以上

者自三代迄今止十君勸帝力行新政因復以用人行政請亦不報向高志不行無月不求去帝輒優旨勉留向高復言臣進退可置不問而百寮必不可盡空臺諫必不可盡廢諸方巡按必不可不代中外離心輦轂肘腋間怨聲憤盈禍機不測而陛下務與臣下隔絕帷幄不得關其忠六曹不得舉其職舉天下無一可信之人而自以為神明之妙用臣恐自古聖帝明王無此法也先是向高疾閣中無人章奏就其家擬旨者一月及是

向高堅臥益久即家擬旨如前論者以為非體向高亦
自言其非堅乞去帝卒不命他相遣鴻臚寺官留至帝
萬壽節始起視事其後向高主癸丑會試章奏皆送闈
中尤異事云帝考選科道七十餘人命久不下向高懇
請數十疏越二年乃下言官既多攻擊紛起帝心厭之
章悉留中向高請盡付所司定其去留因言大臣者小
臣之綱今六卿止趙煥一人而都御史十年不補彈壓
無人人何由戢帝但責言官妄言而大僚迄不補向

高請增置閣臣章至百餘上帝始用方從哲吳道南向
高疏謝因引退優詔不允四十二年二月皇太后崩三
月福王之國向高乞歸益數章十餘上至八月允其去
向高以三載考績進太子太保文淵閣大學士敘延綏
戰功加少保兼太子太保改戶部尚書武英殿一品三
載滿加少傅兼太子太傅改吏部尚書建極殿至是命
加少師兼太子太師賜白金百彩幣四表裏大紅坐蟒
一襲遣行人護歸向高在相位務調劑羣情輯和異同

然其時黨論已大起御史鄭繼芳力攻給事中王元翰左右兩人者相角向高請盡下諸疏敕部院評曲直罪其論議顛倒者一二人以警其餘帝不報諸臣既無所見得失益樹黨相攻未幾又爭李三才之事黨勢乃成無錫顧憲成家居講學東林書院朝士爭慕與游三才被攻憲成貽書向高暨尚書孫丕揚訟其賢會辛亥京察攻三才者劉國縉以他過掛察典喬應甲亦用年例出外其黨大譁向高以大體持之察典得無撓而兩黨

之爭遂不可解及後齊楚浙黨人攻東林殆盡浸尋至
天啟時王紹徽撰所為為東林點將錄令魏忠賢按氏
名逐朝士以向高嘗右東林指目為黨魁云向高歸六
年光宗立特詔召還未幾熹宗立復賜敕趣之屢辭不
得命天啟元年十月還朝復為首輔言臣事皇祖八年
章奏必發臣擬即上意所欲行亦遣中使傳諭事有不
可臣力爭皇祖多曲聽不欲中出一旨陛下虛懷恭已
信任輔臣然間有宣傳滋疑議宜慎重綸音凡事令臣

等擬上帝復旨報聞旋納向高請發帑金二百萬為東西用兵之需熹宗初政羣賢滿朝天下欣欣望治然帝本冲年不能辨忠佞魏忠賢客氏漸竊威福構殺太監王安以次逐吏部尚書周嘉謨及言官倪思輝等大學士劉一燝亦力求去向高言客氏出復入而一燝顧命大臣不得比保姆致使人揣摩於奧突不可知之地其漸當防忠賢見向高疏刺已恨甚既而刑部尚書王紀削籍禮部尚書孫慎行都御史鄒元標先後被攻致仕

去向高爭不得因請與元標同罷帝不聽而忠賢益恨
向高向高為人光明忠厚有德量好扶植善類再入相
事冲主不能害直如神宗時然猶數有匡救給事中章
允儒請減上供袍服奄人激帝怒命廷杖向高論救者
再乃奪俸一年御史帥衆指斥宮禁奄人請帝出之外
以向高救免給事中傅樾救王紀將貶謫亦以向高言
僅奪俸紀既罷去御史吳甦王祚昌薦之部議以故官
召忠賢怒將重譴文選郎向高亦救免給事中陳良訓

疏譏權奄忠賢謫其疏中國運將終語命下詔獄窮治
主使向高以去就爭乃奪俸而止熊廷弼王化貞論死
言官勸帝速決向高請俟法司覆奏帝從之有請括天
下布政司府州縣庫藏盡輸京師者向高言郡邑藏已
竭藩庫稍餘倘盡括之猝有如山東白蓮教之亂何以
應之帝皆不納忠賢既默恨向高而其時朝士與忠賢
抗者卒倚向高忠賢乃時毛舉細故責向高以困之向
高數求去四年四月給事中傅樾劾左光斗魏大中交

通汪文言招權納賄命下文言詔獄向高言文言內閣
辦事實臣具題光斗等交文言事曖昧臣用文言顯然
乞陛下止罪臣而稍寬其他以消播紳之禍因力求速
罷當是時忠賢欲大逞憚衆正盈朝伺隙動得櫬疏喜
甚欲藉是羅織東林終憚向高舊臣并光斗等不罪止
罪文言然東林禍自此起至六月楊漣上疏劾忠賢二
十四大罪向高謂事且決裂深以為非廷臣相繼抗章
至數十上或勸向高下其事可決勝也向高念忠賢未

易除閹臣從中挽回猶冀無大禍乃具奏稱忠賢勤勞朝廷寵待厚盛滿難居宜解事權聽歸私第保全終始忠賢不悅矯帝旨敕已功勤累百餘言向高駭曰此非奄人所能必有代為草者探之則徐大化也忠賢雖憤猶以外廷勢盛未敢加害其黨有導以興大獄者忠賢意遂決於是工部郎中萬燝以劾忠賢廷杖向高力救不從死杖下無何御史林汝翥亦以忤奄命廷杖汝翥懼投遵化巡撫所或言汝翥向高甥也羣奄圍其邸大

譟向高以時事不可為乞歸已二十餘疏至是請益力
乃命加太傅遣行人護歸所給賜視彝典有加尋聽辭
太傅有司月給米五石輿夫八向高既罷去韓壙朱國
禎相繼為首輔未久皆罷居政府者皆小人清流無所
依倚忠賢首誣殺連光斗等次第戮辱貶削朝士之異
己者善類為一空云熹宗崩向高亦以是月卒年六十
有九崇禎初贈太師謚文忠

劉一燝字季晦南昌人父曰材嘉靖中進士陝西左布

政使萬歷十六年一燬與兄一焜一煜並舉於鄉越七年又與一煜並舉進士改庶吉士授檢討一焜為考功郎掌京察大學士沈一貫欲庇其私人錢夢臯鍾兆斗等屬一燬為請一燬謝不可夢臯等竟以中旨留由是忤一貫意尋歷祭酒詹事掌翰林院事四十五年春京察黨人用事謀逐孫承宗繆昌期等一燬力保持得免故事掌院無滿歲不遷者一燬居四年始遷禮部右侍郎教習庶吉士光宗即位擢禮部尚書兼東閣大學士

參預機務偕何宗彥韓爌並命時內閣止方從哲一人
萬歷末年神宗欲用史繼偕沈灌兩人方在籍帝命召
之未及至帝復命宗彥一爌爌明日復命朱國祚及舊
輔葉向高而宗彥國祚向高亦皆在籍惟一爌爌入直
甫拜命帝已得疾一爌偕諸臣召見乾清宮明年九月
朔帝崩諸臣入臨畢一爌詰羣奄皇長子當柩前即位
今不在何也羣奄東西走不對東宮伴讀王安前曰為
李選侍所匿耳一爌大聲言誰敢匿新天子者安曰徐

之公等慎勿退遂趨入白選侍選侍領之復中悔挽皇
長子裾安直前擁抱疾趨出一燎見之急趨前呼萬歲
捧皇長子左手英國公張惟賢捧右手掖升輦及門宮
中厲聲呼哥兒却還使使追躡者三輩一燎傍輦疾行
翼升文華殿先即東宮位羣臣叩頭呼萬歲事稍定選
侍猶趨還乾清時選侍居乾清一燎曰乾清不可居殿
下宜暫居慈慶皇長子心憚選侍然之一燎語安曰主
上冲年無母后外廷有事吾受過宮中起居公等不得

辭責明日周嘉謨左光斗疏請移宮時首輔從哲徘徊
其間已又欲援移宮一燎曰本朝故事仁聖嫡母也移
慈慶慈聖生母也移慈寧今何日可姑緩耶初五日偕
同官請即日降旨立宮門以俟選侍不得已移熾鸞
宮天子復還乾清事始大定帝既踐阼從哲被劾在告
一燎遂當國與熿相得甚歡念內廷惟王安力衛新天
子乃引與共事安亦傾心嚮之所奏請無不從發內帑
抑近侍搜遺逸舊德宿齒布滿九列中外欣欣望治焉

明年天啟改元瀋陽失廷臣多請復用熊廷弼一燬亦
言廷弼守遼一載殘疆宴然不知何故翦除及下廷議
又皆畏懼不敢異同嗣後軍國大事陛下當毅然主持
敕諸臣洗心滌慮悉破雷同附和共憂國奉公帝優旨
褒答尋有詔盡謫前排廷弼者姚宗文等官言路多怨
一燬一燬嘗言任天下事者惟六官言路張則六官無
實政善治天下者俾六官任事言路得繩其愆言官陳
事政府得裁其是則天下治於是一切條奏悉下部議

有不經者詔格之初選侍將移宮其內豎李進忠劉朝
田詔等盜內府祕藏過乾清門仆金寶墮地帝怒悉下
法司案治甚急羣奄懼搆蜚語言帝薄先朝妃嬪致選
侍移宮日跣足投井以搖惑外廷御史賈繼春遂上安
選侍書刑部尚書黃克纘給事中李春鵬御史王業浩
輩張大其辭欲脫盜奄罪帝惡繼春妄言且疑其有黨
將嚴譴之一爆謂天子新即位輒疑臣下朋黨異時奸
人乘間士大夫必受其禍乃具疏開帝意為繼春解而

反覆言朋黨無實繼春得削籍去御史張慎言高弘圖
疏救繼春帝欲并罪亦以一燬言而止帝憾選侍甚必
欲誅盜奄王安為司禮亦惡之諸奄百方救卒不得久
而帝漸忘前事安亦為魏忠賢排死諸奄乃厚賄忠賢
為地而上疏辨寃帝果免朝詔死下其疏法司一燬執
奏詔等議誅久無可雪疏直下部前無此制帝不得已
下其疏於閣一燬復言此疏外不由通政司內不由會
極門例不當擬旨謹封還原疏由是忠賢輩大恨朝等

亦竟免死益任用定陵工成忠賢欲以為功一燬援故事內臣非司禮掌印及提督陵工不得濫廕止擬加恩三等諸言官論客氏被謫者一燬皆疏救又請出客氏於外及言官交章論沈淮淮疑一燬言之與忠賢客氏等比而齟一燬一燬持大體不徇言路意言路頗怨又密窺魏客等漸用事一燬勢孤是年四月候補御史劉重慶遂力詆一燬不可用帝怒謫重慶一燬再論救不聽而職方郎中余大成御史安伸給事中韋蕃霍維華

交章劾一燾帝不問既而維華外轉其同官孫杰疑一
燾屬嘉謨為之上疏力攻一燾一燾疏辨求罷帝已慰
留給事中侯震暘御史陳九疇復劾之并刺其結納王
安於是一燾四疏乞歸忠賢從中主之傳旨允其去先
是從哲數稱一燾為首輔一燾不敢當虛位俟葉向高
及向高至入讒言謂一燾尼已至是知其無他力稱一
燾有翼衛功不可去帝復慰留一燾堅臥不起二年正
月疏十二上乃令乘傳歸既歸兵部尚書張鶴鳴與奸

細杜茂劉一巖獄欲指一巖為一燬族株連之刑部尚書王紀不可遂被斥去而一燬得白鶴鳴一燬向所推轂者也已而忠賢大熾矯旨責一燬誤用廷弼削官追奪誥命勒令養馬宗禎改元詔復官遣官存問一燬在位累加少傅太子太傅吏部尚書中極殿大學士八年卒贈少師福王時追謚文端一焜字元丙萬歷二十年進士授行人歷考功郎中佐侍郎楊時喬典京察盡斥執政私人已改文選遷太常少卿以憂去久之由故官

擢右僉都御史巡撫浙江帝遣中官曹奉建鎮海寺於
普陀山一焜偕巡按李邦華爭不可不聽織造中官劉
成卒一焜屢疏請勿遣代已得請會命中官呂貴護成
遺裝奸人遂請留貴督織造疏直達禁中一焜與邦華
極論其罪帝卒命貴代之一焜復疏爭不報貴既任條
行十事多侵擾一焜疏駁且禁治其爪牙貴為斂威一
焜以暇築龕山海塘千二百丈濬復餘杭南湖民賴其
利御史沈珣誣訐其贓私一焜自引去卒贈工部右侍

郎一煜兵部郎中

韓爌字象雲蒲州人萬歷二十年進士選庶吉士進編修歷少詹事充東宮講官四十五年擢禮部右侍郎協理詹事府久之命教習庶吉士泰昌元年八月光宗嗣位拜禮部尚書兼東閣大學士入參機務未幾光宗疾大漸與方從哲劉一燝同受顧命時宮府危疑爌竭誠翼衛中外倚以為重大帥李如柏如楨兄弟有罪當逮治中旨寬之爌與一燝執奏逮如律以登極恩加太子

太保戶部尚書文淵閣大學士從哲去一燬當國燬協
心佐理天啟元年正月兩人以帝為皇孫時未嘗出閣
讀書請於十二日即開筵自後日講不輟從之遼陽
失都城震驚燬一燬以人情偷玩擬御札戒勵百官共
圖實效帝納之廷臣以兵餉大絀合詞請發帑燬一燬
亦以為言詔發百萬兩大婚禮成加少保吏部尚書武
英殿大學士廕一子尚寶司丞未幾以貴州平苗功加
少傅太子太傅建極殿大學士帝封乳母客氏為奉聖

夫人大婚成當出外仍留之宮中御史畢佐周切諫六
科十三道復連署爭皆不納爇一燎引祖制為言乃命
俟梓宮發引擇日出宮二年四月禮部尚書孫慎行劾
方從哲用李可灼紅丸藥罪同弑逆廷議紛然一燎已
去位爇特疏白其事曰先帝以去年八月朔踐阼臣及
一燎以二十四日入閣適鴻臚寺官李可灼云有仙丹
欲進從哲愕然出所具問安揭有進藥十分宜慎語臣
等深以為然即諭之去二十七日召見羣臣先帝自言

不用藥已二十餘日至二十九日遇兩內臣言帝疾已大漸有鴻臚寺官李可灼來思善門進藥從哲及臣等皆言彼稱仙丹便不敢信是日仍召見諸臣問安畢先帝即顧皇上命臣等輔佐為堯舜又語及壽宮臣等以先帝山陵對則云是朕壽宮因問有鴻臚官進藥從哲奏云李可灼自謂仙丹臣等未敢信先帝即命傳宣臣等出移時可灼至同入診視言病源及治法甚合先帝喜命速進臣等復出令與諸醫商推一燥語臣其鄉兩

人用此損益參半諸臣相視實未敢明言宜否須臾先
帝趣和藥臣等復同入可灼調以進先帝喜曰忠臣忠
臣臣等出少頃中使傳聖體服藥後暖潤舒暢思進飲
膳諸臣歡躍而退比申末可灼出云聖上恐藥力不繼
欲再進一丸諸醫言不宜驟乃傳趣益急因再進訖臣
等問再服復何狀答言平善如初此本日情事也次日
臣等趨朝而先帝已於卯刻上賓矣痛哉方先帝召見
羣臣時被衮憑几儼然顧命皇上焦顏侍側臣等環跪

徬徨操藥而前籲天以禱臣子際此憾不身代凡今所謂宜慎宜止者豈不慮於心實未出於口抑且不以萌諸心念先帝臨御雖止旬月恩膏實被九垓為臣子者宜何如頌揚何如紀述乃禮臣忠憤之激談與遠邇驚疑之紛議不知謂當時若何情景而進藥始末實止如此若不據實詳剖直舉非命之凶稱加諸考終之令主恐先帝在天之靈不無恫怨皇上終天之念何以為懷乞渙發綸音布告中外俾議法者勿以小疑成大疑編

摹者勿以信史為謗史文震孟建言獲譴論救甚力三年以山東平妖賊功加少師太子太師時葉向高當國爌次之及楊漣劾魏忠賢二十四大罪忠賢頗懼求援於爌爌不應忠賢深相銜之既向高罷爌為輔每事持正為善類所倚然向高有智術籠絡羣奄爌惟廉直自持勢不能敵而同官魏廣微又深結忠賢遍引邪黨其冬忠賢假會推事逐趙南星高攀龍爌急率朱國禎等上言陛下一日去兩大臣臣民失望且中旨徑宣不復

到閣而攀龍一疏經臣等擬上者又復更易大駭聽聞
有傷國體忠賢益不悅傳旨切責未幾又逐楊漣左光
斗陳于廷朝政大變忠賢勢益張故事閣中秉筆止首
輔一人廣微欲分其柄囑忠賢傳旨諭熿同寅協恭而
責次輔毋伴食熿惶懼即抗疏乞休畧言臣備位綸扉
咎愆日積如詰戎宜先營衛而觀兵禁技無能紓宵旰
憂忠直尚稽召還而撈掠朝堂無能回震霆怒後先諸
臣之罷斥諭旨中出之紛更不能先時深念有調劑之

方又不能臨事執持為封還之愆皆臣罪之大者皇上
釋此不問責臣以協恭責同官以協贊同官奉詔以從
事臣欲補過無由矣乞亟褫臣官為佐理溺職之戒得
旨卿親承顧命當竭忠盡職乃歸非於上退有後言今
復悻悻求去可馳驛還籍諸輔臣請如故事加以體貌
不報曠䟽謝有左右前後務近端良重綸綍以重仕途
肅紀綱以肅朝宇語忠賢及其黨益恨曠去朱國禎為
首輔李蕃攻去之顧秉謙代其位公卿庶僚皆忠賢私

人矣五月七月逆黨李魯生劾爌削籍除名又假他事坐贓二千斃其家人於獄爌鬻田宅貸親故以償乃棲止先墓上莊烈帝登極復故官崇禎元年言者爭請召用為逆黨楊維垣等所扼但賜敕存問官其一子至五月始遣行人召之十二月還朝復為首輔帝御文華後殿閱章奏召爌等諭以擬旨務消異同開誠和衷期於至當爌等頓首謝退言上所諭甚善而密勿政機諸臣參互擬議不必顯言分合至臣等晨夕入直勢不能報

謝賓客商政事者宜相見於朝房而一切禁私邸交際
帝即諭百僚遵行二年正月大學士劉鴻訓以張慶臻
敕書事被重謫熿疏救不聽溫體仁訐錢謙益御史任
贊化亦疏訐體仁帝召見廷臣體仁力詆贊化及御史
毛羽健為謙益死黨帝怒切責贊化熿請寬贊化以安
體仁帝因謂進言者不憂國而植黨自名東林於朝事
何補熿退具揭言人臣不可以黨事君人君亦不可以
黨疑臣但當論其才品臧否職業修廢而黜陟之若戈

予妄起於朝堂畛域橫分於官府非國之福也又率同
官力救贊化不納皇長子生請盡蠲天下積逋報可時
大治忠賢黨爌與李標錢龍錫主之列上二百六十二
人罪分六等名曰欽定逆案頒行天下言者爭擊吏部
尚書王永光南京禮部主事王永吉言之尤力帝怒將
罪之爌等言永吉不宥永光必不安乃止奪俸一年工
部尚書張鳳翔奏厰庫積弊帝怒召對廷臣詰責巡視
科道王都高賚明二人力辨帝命錦衣官執之爌標龍

錫並救解而是日永光以羽健疏劾請帝究主使者爌
退申救都等因言永光不宜請究言官帝不納然羽健
卒獲免初熊廷弼既死傳旨九邊屍不得歸葬至是其
子詣闕疏請爌等因言廷弼之死由逆奄欲殺楊漣魏
大中誣以行賄因盡殺漣等復懸坐廷弼贓銀十七萬
刑及妻孥寃之甚者帝乃許收葬時遼事急朝議汰各
鎮兵又以兵科給事中劉懋疏議裁驛卒帝以問爌爌
言汰兵止當清占冒及增設冗兵爾衝地額兵不可汰

也驛傳疲累當責按臣核減以甦民困其所節省仍還之民帝然之御史高捷史莖以罪免永光力引之都御史曹于汴持不可永光再疏爭曠言故事當聽都察院咨用帝方眷永光不從九月以將行慶典請停秋決亦不從時逆案雖定永光及袁弘勛捷莖輩曰為翻案計至十月

大清兵入畿甸都城戒嚴初袁崇煥入朝嘗與錢龍錫語邊事龍錫東林黨魁也永光等謀因崇煥興大獄可

盡傾東林倡言

大清兵之入由崇煥殺毛文龍所致捷遂首攻龍錫逐
之明年正月中書舍人加尚寶卿原抱奇故由輸貲進
亦劾煥主謀誤國招寇欺君郡邑殘破宗社阽危不能
設一策拔一人坐視成敗以人國僥倖宜與龍錫並斥
其言主謀者以煥崇煥坐主也帝重去煥貶抱奇秩無
何左庶子丁進以遷擢愆期怨煥亦劾之而工部主事
李逢申劾疏繼上煥即三疏引疾詔賜白金彩幣馳驛

遣行人護歸悉如彝典進逢申並曠會試所舉士也曠
先後作相老成慎重引正人抑邪黨天下稱其賢獨嘗
庇王永光云十七年春李自成陷蒲州迫曠出見不從
賊執其孫以脅曠止一孫乃出見賊釋其孫曠歸憤鬱
而卒年八十矣

朱國祚字兆隆秀水人萬歷十一年進士第一授修撰
進洗馬為皇長子侍班官尋進諭德日本陷朝鮮石星
惑沈惟敬言力主封貢國祚面詰星此我鄉曲無賴因

緣為奸利耳公獨不計辱國乎星不能用二十六年超擢禮部右侍郎湖廣稅監陳奉橫甚國祚貽書巡按御史曹楷令發其狀帝怒幾逮楷奉亦因此撤去尚書余繼登卒國祚攝部事時皇長子儲位未定冠婚踰期國祚屢疏諫戚臣鄭國泰請先冠婚後冊立國祚抗疏言本朝外戚不得與政事冊立大典非國泰所宜言況先冊立後冠婚其儀仗冠服之制祝醺敕戒之辭陞降坐立之位朝賀拜舞之節因名制分因分制禮甚嚴且辨

一失其序名分大乖違累朝祖制背皇上明綸犯天下
清議皆此言也又言冊立之事理不可緩初謂小臣激
聒故遲之後羣臣勿言則曰待嫡及中宮久無所出則
曰皇長子體弱須其強今又待兩宮落成矣自三殿災
朝廷大政令率御文華殿三禮之行在殿不在宮頃歲
趣辦珠寶戶部所進視陛下大婚數倍之遠近疑陛下
借珠寶之未備以遲典禮且詔旨採辦珠寶額二十四
百萬而天下賦稅之額乃止四百萬即不充國用不給

邊需猶當六年乃足必待取盈而後舉大禮幾無時矣
已又言太祖成祖仁宗即位初即建儲貳宣宗英宗冊
為皇太子時止二歲憲宗孝宗止六歲陛下亦以六歲
未聞年十九而不冊立者國祚攝尚書近二年爭國本
至數十疏儲位卒定陝西狄道山崩其南湧小山五國
祚請修省社稷壇枯樹生烟復陳安人心收人望通下
情清濫獄四事雲南巡撫陳用賓進土物國祚劾之尋
轉左侍郎改吏部御史湯北京劾其縱酒踰檢帝不問

國祚遂引疾歸光宗即位以國祚嘗侍潛邸特旨拜禮部尚書兼東閣大學士入閣參機務天啟元年六月還朝尋加太子太保進文淵閣國祚素行清慎事持大體稱長者明年會試故事總裁止用內閣一人是科用何宗彥及國祚有譏其中旨特用者國祚既竣事即求罷優詔不允都御史鄒元標侍經筵而躡帝遣中使問狀國祚進曰元標在先朝直言受杖故步履猶艱帝為之改容刑部尚書王紀為魏忠賢所逐國祚合疏救復具

私揭爭之紀為禮部侍郎時嘗以事忤國祚者三年進
少保兼太子太保戶部尚書改武英殿十三疏乞休詔
加少傅兼太子太傅乘傳歸明年卒贈太傅謚文恪從
子大啟文選郎中終刑部左侍郎同時朱國禎字文寧
烏程人萬歷十七年進士累官祭酒謝病歸久不出天
啟元年擢禮部右侍郎未上三年正月拜禮部尚書兼
東閣大學士與顧秉謙朱延禧魏廣微並命閣中已有
葉向高韓爌何宗彥朱國祚史繼偕又驟增四人直房

幾不容坐六月國禎還朝東謙延禧以列名在後謙居其次改文淵閣大學士累加少保兼太子太保魏忠賢竊國柄國禎佐向高多所調護四年夏楊漣劾忠賢廷臣多勸向高出疏至有詬者向高愠甚國禎請容之及向高密奏忤忠賢決計去謂國禎曰我去蒲州更非其敵公亦當早歸蒲州謂曠也向高罷曠為首輔曠罷國禎為首輔廣微與忠賢表裏為奸視國禎蔑如其冬為逆黨李蕃所劾三疏引疾忠賢謂其黨曰此老亦邪人

但不作惡可令善去乃加少傅賜銀幣廕子中書舍人
遣行人送歸月廩輿夫皆如制崇禎五年卒贈太傅謚
文肅

何宗彥字君美其父由金谿客隨州遂家焉宗彥舉萬
歷二十三年進士累官詹事四十二年遷禮部右侍郎
署部事福王之國河南請求無已宗彥上疏言可慮者
有六帝不聽又屢疏請東宮講學皇孫就傅及瑞惠桂
三王婚禮太子生母王貴妃薨不置守墳內官又不置

墳戶贍地宗彥力爭之梃擊事起宗彥因言天下疑陛下薄太子久太子處積輕之勢致慈慶宮門止守以耄年二內侍中門則寂無一人乞亟下張差廷訊凡青宮諸典禮悉允臣部施行宗社幸甚不報尋轉左侍郎署部如故四十四年冬隆德殿災宗彥請通下情修廢政補缺官明年皇長孫年十三未就傅宗彥再疏力言自是頻歲懇請帝終不納四十六年六月京師地震上修省三事時帝不視朝已三十載朝政積弛庶官盡曠明

年秋遼事益棘宗彥率僚屬上言自三路喪師開原鐵
嶺相繼沒瀋陽孤危請陛下臨朝與臣等面籌兵食大
計帝亦不報宗彥清修有執攝尚書事六年遇事侃侃
敷奏時望甚隆其年十二月會推閣臣廷臣多首宗彥
獨吏部給事中張廷登不署名遂不獲與宗彥旋乞假
去御史薛敷政蕭毅中左光斗李徵儀倪應春彭際遇
張新詔等交章惜之而廷登同官忝詩教薛鳳翔又屢
疏糾駁其時齊黨勢盛非同類率排去之宗彥無所附

麗故終不安其位明年神宗崩光宗立即家拜禮部尚書兼東閣大學士天啟元年夏還朝屢加少師兼太子太師吏部尚書建極殿大學士四年正月卒官贈太傅謚文毅弟宗聖由鄉舉歷官工部主事以附魏忠賢驟加本部右侍郎崇禎初削籍論配名麗逆案

孫如游字景文餘姚人都御史燧曾孫也萬歷二十三年進士累官禮部右侍郎四十七年冬左侍郎何宗彥去位署印無人大學士方從哲屢以如游請明年三月

始得命部事叢積如游決遣無滯時白蓮無為諸邪教橫行宗彥嘗疏請嚴禁如游復申其說帝從之七月帝疾大漸偕諸大臣受顧命帝崩鄭貴妃懼禍深結李選侍為請封后選侍喜亦為請封太后以悅之楊漣語如游曰皇長子非選侍所愛選侍后嫡矣他日將若何亟白執政用遺詔舉冊立登極三日公即援詔以請如游然之八月朔光宗即位三日如游請建東宮帝納之俄遵遺旨諭閣臣封貴妃為皇太后如游奏曰考累朝典

禮以配而后者乃敵體之經以妃而后者則從子之義
祖宗以來豈無抱衾之愛而終引去席之嫌此禮所不
載也先帝念貴妃勞不在無名之位號陛下體先帝志
亦不在非分之尊崇若義所不可則遵命非孝遵禮為
孝臣不敢曲徇自蹈不忠之罪疏入未報如游尋進本
部尚書帝既命建東宮又言皇長子體質清弱稍緩冊
立期如游力持不可二十三日命封選侍為皇貴妃期
已定矣越三日帝又趣之如游奏曰先奉諭上孝端皇

后孝靖皇太后尊諡又封郭元妃王才人為皇后禮皆未竣貴妃之封宜在後既聖諭諄切且有保護聖儲功即如先所定期亦無不可帝許之選侍以貴妃為未足必欲得皇后二十九日再召廷臣選侍迫皇長子言之如游曰上欲封選侍為皇貴妃當即具儀進帝漫應曰諾選侍聞大不悅明日帝崩朝事大變如游請改冊封期報可熹宗為皇孫時未就傳即位七日如游即請開講筵亦報可十月命以東閣大學士入參機務言者訖

其不由廷推交章論列如游亦屢乞去帝輒免留天啟
元年二月上疏言祖宗任用閣臣多由特簡遠者無論
在世廟則有張璉桂萼方獻夫夏言徐階袁煒嚴訥李
春芳在穆廟則有陳以勤張居正趙貞吉在神廟則有
許國趙志臯張位即皇考之用朱國祚亦特簡也今陛
下冲齡臣才品又非諸臣比有累至尊知人之明乞速
賜骸骨還田里帝仍留之如游十四疏乞去乃加太子
太保文淵閣大學士遣官護送廕子給賜悉如彝典家

居四年卒贈少保謚大恭孫嘉績字碩膚崇禎十年進士授南京工部主事召改兵部

大清兵薄都城按營不動衆莫測嘉績曰此待後至者即舉衆南下爾越三日蒙古兵數萬果從青山口入即日南下於是尚書楊嗣昌以嘉績知兵調為職方員外即進郎中督師中官高起潛譖之會有發其納賄事遂下獄已黃道周亦下獄嘉績躬親飲食湯藥力調護之因從受易會諸生涂仲吉疏救道周帝益怒移獄錦衣

麗訊諸生與道周往來者多詭詞自脫獨嘉績無所隱
擬雜犯死罪繼擬烟瘴充軍多不允保定總督張福臻
陛見薦嘉績才請用為參謀不聽徐石麒為刑部尚書
具爰書奏乃釋之福王時起九江兵備僉事未赴魯王
監國紹興擢右僉都御史累進東閣大學士王航海嘉
績從至舟山其年遘疾卒

贊曰熹宗初葉向高以宿望召起海內正人倚以為重
卒不能有所匡救蓋政柄內移非一日之積勢固無如

何也劉一燝韓爌諸人雖居端揆之地而宵小比肩權
璫掣肘紛撓抗程幾不自全朱國祚何宗彥絀於黨人
孫如游又皆以中旨特用為外廷所詬於是而知明良
相遭誠千載之一遇也夫

明史卷二百四十

欽定四庫全書

明史卷二百四十考證

葉向高傳趙聖

臣嚴福按趙聖紀事本末作趙思聖

與傳異謹附考

劉一燝傳選侍不得已移噦鸞宮

臣嚴福按后妃傳

選侍移居仁壽宮與此互異謹識

韓爌傳以兵科給事中劉懋疏議裁驛卒

臣嚴福按

綏寇紀畧懋請裁定驛站歲可節金錢數十萬上喜

著為令有濫予者罪勿赦意謂蘓民力也而遊民藉食驛糈者無所得食遂相率為賊謹附考

朱國祚傳三年進少保兼太子太保戶部尚書改武英

殿

臣

嚴福按宰輔表國祚以天啟元年九月晉太

子太保其年十月晉少保改武英殿傳言三年進少保與表互異

何宗彥傳以附魏忠賢驟加本部侍郎

臣

嚴福按宗

聖為魏忠賢建祠房山閣黨傳又以宗聖為太僕寺

卿與此互異謹識





總校官編修臣吳紹深